

卷九上

漳平縣



漳平縣志卷九上



藝文志上

疏 傳 書後 序 論 記

文與獻相表裏故惇獻尤先惇典文之所垂此  
典也藝云乎哉顧藝焉而著爲文必其可垂之  
爲典以與志發明者然後錄諸編惜乎元明以  
前其文若夏鼎商彝不可復覩矣作藝文志

疏

建言疏

寓賢 陳真晟 鎮海衛

漳平縣志

卷九上 藝文上一

布衣臣陳真晟謹奏爲建言事臣聞布衣廷對苟無  
圖富貴之心而直欲言天下事者先儒許之以爲可  
尚矧宋程頤氏大儒也爲布衣時亦常不待朝廷招  
之間之而且往上書乞召對固有似於輕售其道者  
矣厥後朱熹氏序頤年譜亦不以爲非而錄之豈非  
是又一道耶臣卑陋至愚固不敢擬跡先儒然竊願  
學程朱萬一之學而實無圖富貴之心者也故亦敢  
效程氏故事焉然臣所以有言者非敢自專也奉恩  
詔有時政得失許諸人直言無隱之文此聖朝大開

言路是欲盡天下之善以聞之也臣竊以爲時政得失固所當言而風化者時政之本也其得失則尤所當先言焉但本領大事非面陳不可伏望陛下不以臣爲卑陋至愚而忽之乞於萬幾之暇賜一召見如古聖君下詢芻蕘故事俾臣得一陳其鄙見無他只是欲正士習以淳民風復三代之故事亦間易易行者也如所言不當甘受重誅無悔臣無任昧死之至謹具以聞伏候勅旨

奏正風教疏

陳真晟

漳平縣志

卷九上

藝文上二

布衣臣陳真晟謹奏爲正風教事臣竊惟今天下彌文矣故臣不敢更飾浮詞而輒陳鄙見焉臣伏覩丁丑科廷試錄見聖制篇首之問有曰吾之士進以禮退以義爲上爲德爲下爲民今何其立功之志溺利祿之心勝奔競之風未息廉介之節少著其失安在臣即是而觀甚知陛下有思古慨今之意也至其篇終又曰今欲士正其習民淳其風庶幾唐虞三代之盛必有其道務求切至之論將擇而行此可見聖士將大有爲可謂千載一遇之問而天下萬世之福慶

者也故臣謹採先儒之說爲小書一卷題曰程朱正學纂要來上竊欲效廷對之意也大抵三代所以盛者學校興師道立而心學正教明於天下也後世雖有學校之設然專以科舉俗學爲教殊不知俗學益盛則心學益廢此自然之理是無怪乎士習不正民風不淳而三代之治久不復見於今世也然則爲今之法當何如哉臣聞父師之論而得一說謂可且就科舉之後補此一教如程朱所定三代學制之法再假以一二年聖學工夫然後除授如此則俗學稍輕

正學自重人相習尚積成風化不患三代之不能復矣所謂深求切論可擇而行者殆有在於此乎然此非臣之言臣父師之議也非臣父師之議實大學或問所謂兼補之法也雖或問主爲學者自補而言然司教化者朝廷也與學者自補其學於下孰若朝廷通補一教於上豈不周徧廣大尤足盡朱氏立法之意哉况心學既明不惟有以正士習於天下尤足以示道統之真傳俾皇家聖子聖孫常得見聞帝王心學非但口耳講說如漢唐宋元東宮之教而已則方

今急務又豈有大者哉臣布衣至愚且老瀕死之餘萬無圖富貴之心然奉明詔言得失得失之本莫大於此故臣願效一言而歸死山林瞑目焉伏望聖裁倘可采而行殆皆先儒之本意云臣無任昧死之至謹具奏以聞

崇祀理學眞儒疏

明給事中石應岳龍巖

題爲崇祀理學眞儒以光道化事臣恭覩皇上卽位以來親賢問道稽古右文得堯舜湯文之正傳爲仁義禮樂之宗主邇者允禮臣言將已故儒臣章懋祀

漳平縣志

卷九上

藝文上四

正學祠吳與弼陳獻章胡居仁各專祀于其鄉一時搢紳章縫之士欣欣然喜動顏色以爲聖主崇尚理學眞得褒往勸來之大機臣鄉先儒布衣臣陳眞晟年十七八時即能自拔于流俗而拒絕異端崙心儒業嘗應有司之薦就試省闈聞有司防察苛密無待士禮遂辭歸不復以科舉爲事篤志聖賢從事理學初讀中庸做存養省察工夫覺無統緒繼讀大學方知爲學次第乃以大學爲據及讀朱子主敬之說又知敬者大學之基本及求其所以爲敬見程子主一

無適之說又于敬字見得親切嘗語人曰大學誠意章爲鐵門關難過主一二字乃其玉鑰匙也故身心動靜一以居敬爲主本源澄徹義理精明躬行古道卓然自信嘗曰寧百見毀于世俗毋一得罪于先王此其槩也天順間倣程頤故事詣闕上書冀行所學其書名程朱正學纂要首採程氏學制次採朱子論說補正學工夫次二圖一言聖人心與天同運一言學者心法天之運次立明師補正學輔皇儲隆教本數事以終上文圖說之意疏上未行而歸家居見英

漳平縣志

卷九上

藝文上五

宗皇帝勅諭學校中有主敬窮理修己治人敦尚孝弟忠信等語喜曰此學校正教也然學校雖崇正教而科舉不定正考雖有正教弗行因採勅諭中要語參以程氏學制呂氏鄉約朱熹貢舉私議作正教考定會通定考德爲六等考文爲三等各有案例可據而行晚年徧遊名山博訪通志聞江西吳與弼名欲往質之編修張元禎止宿叩其學所得大加稱許曰斯道自程朱以來惟先生得其真吳許二子亦未是遂歸鎮海初閩中雖多讀書學術猶未正自真晟與

其徒周瑛倡明理學而趨向始端雖已知向學禮教猶未明自眞晟與里人李文舉講行家禮而風俗始化遠邇聞風感發興起莫不以眞晟爲準的而願依歸之蓋眞昭代之名儒天民之先覺也沒後尚書楊廉編纂理學名臣錄凡十有五人首薛瑄次吳與弼次即眞晟其稱贊之詞有曰端默沉潛慕回如愚持守有餘和靖之徒百年公論于此可見雖已經提學姚鏞舉入漳州鄉賢祠中然不過與俎豆之列尚未見特加尊崇且眞晟與與弼獻章一時同志理學齊

漳平縣志

卷九上

藝文上六

名雖獻章亦自慨慕其人以爲寥寥僅見今與弼等俱蒙專祀而眞晟未與似爲未舉之典臣愚伏望勅下禮部查議如果臣言不謬將眞晟比照與弼等例行令原籍建祠專祀庶先哲幽潛得蒙褒揚于既往而後學景仰亦思勉勵於將來不惟臣鄉里後進私自厚望至于海內宿學人士亦所同然懇惟聖明特賜俞允臣無任惓惓之至

傳

朱鵬山先生家傳

通政司雷鉉  
寧化

鵬山諱廷鴻字大羽一字雲翼漳平人世居暖洲鄉及邑兆隅自五世祖復菴公爲名孝廉簪纓相繼十世矣鵬山州司馬子紹公長子也子紹公承家時特貧而素履不渝教子必擇名師奉之盡禮雖貿衣質器弗靳也鵬山少奮志與諸季相砥礪嚴寒盛暑無少閒質近魯讀書心過百遍并力攻苦廢寢餐而識地過人辨論經史疑義每奪同人席作爲文章瑰瑋俊逸體經數變樹義總根理要方其得意下筆疾若風馳有未協雖十易稿而不吝年十九補博士弟子

漳平縣志

卷九上

藝文上七

員廿六受知於汪公棣園試輒冠其曹漳浦蔡文勤公合漳之魁杰雅集東江相與講朱子之學鵬山與焉志力專確精進勇猛同學咸目爲畏友旣歸邑弟子願受業者踵相接鵬山循循誨之階梯五子原本六經務以身體不徒作語言文字故今邑之敦行不怠學古成一家言者皆其門下士平邑在漳之西北海氛時戶罕完瓦鵬山佐子紹公葺祖父墳祠修居室力恆不繼拮据卒瘞以成之子紹公家政嚴肅有不力厥職者繼以誚讓鵬山左右匡彌務釋親口或



受譴責則長跪引咎其平居化誨消弭俾無卽疚戾者多矣蓋其志性純篤如此鵬山居己慎重邑令袁敬庵特禮之延以西席講課外語無他及歷數年從無絲毫事受人指摘嘗館於半山之麓有與族人爭產者欲搆難鵬山以張其事族人闖其講幄怒詈冀得鵬山忿遂可羅之訟鵬山了不與校門人環視意不能平鵬山麾之避來者計窘慙阻而去識者徵其雅量鵬山以家貧力學重負賢師友期許年四十五猶得侍子紹公而數竒不偶屢躓場屋年五十乃領漳平縣志

卷九上 藝文上八

鄉薦第二而子紹公已捐館五年矣得雋之日感動號泣蓋不悲其遇時之晚而深痛父死之迫不我待也甲辰會試春官文勤公稱其文有古會元風格竟報罷至庚戌又罷會

世宗憲皇帝諭九卿保舉倉場監督文勤公以鵬山名薦時鵬山以太母年七十有五決意終養戚友咸以奉檄色喜之義相勗且得太母手諭謂若生日所爲懸弧者何爲夫孝始於事親中於事君若往盡乃心無忘厥官吾復何憾遂就職事雖小必親倉廩向有

陋規盡革之出納之留難胥吏之中飽一時弊絕例以三年差滿請

旨敘用未報而鵬山卒享年五十有九

書後

書忠國志魏侯事蹟後

陳六韜 邑人

嘗客外見有老者焉年可六十許偉軀而豐頤黎面而熊視攜其一子一婦傭於人而孤寘一甌以自給屏竹爲衛容不盈咫傴僂以入委蛇而後能屈信余眡其貌而怪之頃之從余過南侯之洞洞頗險峻中

漳平縣志

卷九上 藝文上九

虛而外石樹埤可容指十千中可容指數十千戰守形勢隱隱可想見也余歎曰辟寇耶其爲寇耶今不復識其誰氏矣老者曰是故渠魁李烏嘴所營者彼雖守險無以爲也其後殿于吾鄉皆殲焉吾鄉久明也余見其老頗貌敬之不知其能知故實因與語爲余道庚辛之變甚悉其言曰吾身長而膽壯少時應募爲義兵以力健爲一社首然數竒始從邑尉將禦寇于分水界未及而敵猝至我兵倉皇散佚吾挾尉以走尉德之益命吾爲甲長言多聽者久之復從邑

侯魏剿寇魏侯死焉吾因不復爲兵而自蔽於鄉里當魏侯之沒也其失筴皆在我先是寇聚於龍頭寨謬爲偵者來曰賊以來日俱出糴吾急走數十里擣其虛成禽矣侯信之臨發發號皆不鳴有止之者弗爲止也行數里許忽長虹集於頂雨暴至有止之者弗爲止趣而前未幾賊伏發徑狹甚隊伍不成咸奔潰後者不知前者去前者不知後者至侯遂遇害侯仁人也而天阨之然侯亦自失所寵永福士兵賞賚每厚焉他者多不堪及難仍不得其力亦不得衆力

方是時兵燹連年喁聚而竊起者不可勝計癸亥華對之寇以千數猝至吾里居民宵遁吾與諸少年據守石門隔諸少年父母爲虜其子詳爲譯者往偵之忿甚號於衆曰必報怨有死無二遂操刃以往遇寇搜于山澤者獲之凡五人問所長皆曰無有曰彼冠通天而蟒者何如曰亦無有于是咸知烏合之寇無能爲矣翌日揀敢士十九人以往日停午賊方食十九人驟至薄賊營賊不知所爲悉衆倉倉來迎十九人忽分爲十九路各當一面裹而圍之無一不當百

者賊左右應不給遂亂竄殺級不計生擒九皆副之  
奪所虜父母及餘諸被獲若干人以歸是役也以十  
九人破賊六七百人賊落膽矣不數日諸寇復集約  
千餘請戰不許又二日我兵鳩各鄉之豪者得百人  
分爲三道以出而留其二路各置一人鼓之如伏狀  
賊疑甚三道卒至接戰於溪坂賊大潰殲者十之八  
積骸盈堤水爲之赤其魁匿人舍執而磔之時吾操  
刀從事所殺者夥矣血汙刀把不可復殺以水滌之  
又復殺兵寇連年人民殃甚是舉頗足償恨初流寇

漳平縣志

卷九上

藝文上十一

之集也邑發官軍來禦軍多龍谿人營相距百步皆  
賊所親暱相呼道舊陽爲拒守觀望而已官家饋饟  
給之皆取足於吾里吾民兵凡兩戰卒未聞有一人  
鼓噪而前者輸餉稍不給輒怒而起攫倉屠畜助寇  
爲虐民生其間亦不幸矣吾不分乃至今日至今日  
雖窮餓傭於人猶之乎爲太平犬也雖然吾老矣吾  
兩從征濱死不死兩遇敵一大戰不死今乃不知死  
所也向當萑寇四起時民雖逃匿猶見暫乘間以時  
耕穫乃今吾里中有闔境俱無烟突禾稻茶菓委地

不收六畜布野深山深處征徭莫避捕聲捉影蔓及  
株連一卒號呼四隣屏竄苛政猛於虎今殆猛於盜  
乎余無以應爲之嗟歎久之歸而思其言皆足以警  
諸在位者又所指引皆可據因取忠國志閱之見所  
書魏侯死事不能詳但曰漳平令魏奮勇當先死之  
余又聞侯死時有侍者亦魏姓華口人抱侯頸大呼  
曰死虜敢殺邑君邑君死天兵至死虜無類矣賊怒  
先斫之罵不絕賊亦尋悔天兵剿楊益已果如侍者  
言志亦闕焉志中記李烏嘴與楊益同時不聞其死

漳平縣志

卷九

藝文上十二

於此也久明所盡屠者俗名其魁曰鴨毋老志亦不  
書因并記之老者盧姓忘其名與余語在萬歷戊申  
夏五月時邑君陳象初治邑諱所志 魏侯將及難  
衆皆解散獨民壯黃尾操戈以衛殲賊甚衆竟死之  
後追義其舉終明世歲畀工食供祀茲與魏侍者死  
事同舊志皆闕因附識於此

序

秦學博擢柳城教序

蔡夢說 龍巖

余巡歷南粵事竣將報命闕下僂道過里門會隣邑

漳平博士念劬秦君遷秩龍城柳邑掌教將行其門弟子眷眷不能別去其素矜而式若諸縉紳先生及所考德而問業若諸後生小子靡不人人賢秦君相與過余徵言序之平距敝邑不二百里而近教澤所波璧光所燭余又及親挹秦君丰度稔知秦先生賢微諸君言余寧已言哉歐陽子有云司諫雖卑與口相等余以爲司教之責亦然夫國家師儒之設以育賢也宰相所登用必出於師儒之所教育昔文中子講道河汾而房元齡魏徵之徒出焉胡安定教授蘓

漳平縣志

卷九上

藝文上十三

湖而孫覺范純仁之徒出焉貞觀之不績元祐之太平識者不曰宰相得人之功而必以爲文中安定之功也然則師儒之所關繫亦鉅矣是惟學問該洽者而後足以應人惟制行峻卓者而後足以鑄人惟道德勛業實自期待可以廉頑可以寬鄙惇薄而後足以培植人余聞念劬君之先君子博雅溫良嘗振鐸於四庠蓋有河汾蘓湖之遺燼焉四邑之學者迄今歌頌之不衰念劬君步趨庭訓夙敦正學及貢上春官謁選於冢宰而分教於平邑平之初治則布衣陳

眞晟先生之所發蒙也先生之教專心致志務爲踐履之學一切皮膚口耳時師陳言不復屑事平之士宗之如違者廓齋曾氏道學得傳歸然俎豆若文溪陳氏蘭居蔣氏卓然崇正方議報祀澤宮謂非私淑布衣先生之遺訓不可乃念劬君至益表章眞晟之學不凋不琢不漓其眞日進諸生談文課藝以聖賢學問豪杰事功相期許而獎掖后進孳孳不倦尤加意鶉結之士悉心賑念無已時居常自喟曰青氊之况自古已然然吾服先君子貽訓矢不家於官也

漳平縣志

卷九上

藝文上十四

即使不佞日奏簿書挾三尺從事豈若與二三子明先王道古昔續先正之傳耶二三子龍蒸鵲起殆無忘斯時哉爾時君於寅長三山林君道義淑人銳意興學而君協贊厥成相得益彰數載間葺啟聖宇起百年之頽廢闢大會之堂羣諸生而省試之平人士翕然丕變抑者以奮怠者以起君之有功於往聖後學非淺鮮已今遷柳城既儼然正臬比爲一邑學者大師試與二三子憑高而眺非昔賢柳宗元氏所故徘徊處耶柳人故未知學子厚不鄙夷其民爲設教

禁州人順賴焉衡湘以南成進士者皆以子厚爲師其經承指授者皆能以文章取高等儒者之效大槩可覩君茲行矣余知吾道與君之馬首俱西也君之教柳人當不異於教平人七閩百粵相距數千里而道化所浹前後不殊計日當或有如房如魏若孫若范之儔起應新天子綦隆之運時則上泝師友淵源而念劬君之師範將與王文中胡翼之儷美無窮矣又何重今日之別乎哉平余桑梓也而余所按行州郡數與柳接壤知其俗雖雜猺而可教以愛人易使

漳平縣志

卷九上

藝文上十五

旣以得師爲平人賀又以爲柳人賀且以我國家得賢師儒教育之功徐收人才之用余又將爲天下賀也於是乎言

彭侯考績調上杭序

陳六韜

豫章渚沃彭公蒞漳平之三載政成當報績父老弟子縉紳先生徵言於余揖余言曰吾侯仁人也而上理奏最其於不次登也猶掇之也天惠吾平其或者獲遂借恂之願乎哉非所敢望也居數日復馳語余曰固矣吾下邑之不足縻吾侯也大中丞王公循



行海甸其殆聞吾邑絃誦聲乎數顧函牛之鼎而莞爾也章亟上得報可而吾侯有移理上杭之命矣侯仁人也今爲有力者奪之何能無介然於懷也余惟古君民上下之相與情有所感發而不能已則必形之歌咏以誦之如羔羊崧高蒸民諸篇大都揚挖其大夫約己惠民服勤王命不倦而至其肫切懇至則莫若樂只君子民之父母之一言故大人之學在親民上親民民亦親上上下下交相親以成此名也而今獨以名吾令何也令之於民最親也然蓋難言之矣

有父母而視子於此毛屬而裏離有令而視民於此毛不相屬而裏不相離也危加之愀然輕省之藐然一以爲赤子一以爲龍蛇牽嫌忌而或掣之右不乃躁不自持計日得踐更逝如脫兔其何有於一日之愛而父母之爲蓋非仁心爲質愛惡去存與百姓共之刑期措訟使無者亦第口父母之云耳平之爲邑山川阻深風土礪固學道而示之先亦庶幾乎易使者顧自吉水鼉江兩君後蕭條逋亡所望仁人慈父母者十餘年於此矣彭公至則喟然曰邑無僻與小

惟德是視不佞在此毋論鷄犬桑麻實吾宇下彼撤其寧宇而翦爲逋逃則若我襁抱而鴻鴈置之毋亦勞來還定庶其有集徵輸故有額可一日鞭箠使也譬湍激之下重不可磯令實有民謂浚我以生何卽不佞以勤諸大吏今日一檄書譙焉明日一檄書譙焉毋寧自署其考曰撫字心勞徵斜政拙而已民卽有競無乃卒有忿忿之心摩之時日柔之清明重之父兄親戚之勸誘何渠蔑有悔志吾何敝敝日從案牘間得情爲喜也史稱循吏在神爵五鳳間者大抵

漳平縣志

卷九上

藝文上十七

所在無赫赫名所去常見思云不佞何以得此於民亦惟是宣布詔令寬和爲名令民知上意耳若召信臣卓茂爲邑視民如子所居見稱亦安在無赫赫名也不然孰無父母且孰不父母令其使百姓實應且□蓋公之爲漳平盡善政也而其大指稱是矣仁心□質卽有愛惡去存誰不宜之下車甫一載而民之不能終訟者已十八九矣迎綸逐餌何邑蔑有公入□陽鱗遠焉所取士輒自寒素中賞識之度無以報知己者則孜孜向學其他亦蒸蒸嚮風已先是歲比

不登今茲雞犬寧而婦子嬉若不知誰爲之者田疇子弟公實噢咻之洵不愧令不愧令而父母哉頃者攝理巖邑巖人歌孔邇焉杭則豈有異也公於親民之學大矣羔羊之修潔崧高蒸民之明哲慎徽疑未足以槩公也雖然賢者固有所不可測平胥隸狡於十邑所從漸矣公至之明日釐宿弊而揭之取其乾沒那移詭射之尤者聞之當道闔邑詫爲神明一懲百倣猾是用輯又邑有豪弟子弗念天顯以賄斂法舊矣頃復麗大辟謀所以撓公者百指公毅然爲匹

漳平縣志

卷九上

藝文上十八

夫匹婦復讐也上之中丞臺御史臺督學使者論殺士民萬口稱快故曰國人殺之也如此然後可以爲民父母公眞仁者之勇乎夫賢者固有所不可測杭視平爲劇公蓋裕爲之矣昔者子由治蒲曰邑壯又難治也子曰恭而敬可以攝勇寬而正可以懷強愛而恕可以容困濫而斷可以抑奸何難焉凡此皆公所用父母平民者何施不可國家需賢正亟公將不次而遷斯世斯民實嘉賴之樂只君子邦家之基德□不已其爲公竟南山之誦乎哉公世爲循吏家居

以文學名世吟社詞盟殆遍江浙茲復以文學飾治其斯中丞公所數顧而莞爾者乎長君頃以茂年與計偕又以知仁人有後矣請以爲公賀因贈公以行

重建文昌閣於東山序

知縣 傅維祖

平邑大勢龍從西北而來水過堂而微反砂尖竄以斜飛此所以情易爭而財難聚也縣署後山當缺背受凹風學宮之中文昌閣居辰位爲坎山之曜煞頗不利於宮墻余相度情形思爲補救莫若令北門外溝水繞至東門鑿地疏流遏其東去引之南出會於

漳平縣志

卷九上 藝文上十九

大溪則水勢抱城無復尖斜之弊費大而難且俟後圖北山賴前令趙公留心縣務建一元天閣以禦凹風今余於其側又建一書院以助其勢亦補缺障空之一法也東山巽位文明之地爲邑下砂最宜培植歷任諸君子或建塔或建文公祠或栽植樹木厥爲要圖夫文星高顯則一邑之文風丕振嘗與學博蔡劉二先生商確移文昌閣居於此地基築高臺架屋於上庶幾萃東方之秀氣助闔邑之精華費不多而工易就實爲今日之先務云業捐薄俸爲之舉行不

數月而經營成行見科甲蟬聯文風綿遠實余之厚望焉

修金鷄潭舅姑嶺序

傅維祖

自平邑改隸州轄而金鷄潭舅姑嶺一帶乃屬上州之孔道其險仄崎嶇幾不容足下臨深潭上逼危石風厲雨滑稍一失足身命難保過此目擊心惻不得不亟爲平治况修路葺橋現奉

恩詔凡有地方之責者正宜宣

上德意遵行不怠現今州憲張公振厲整飭事事修舉

漳平縣志

卷九上

藝文上二十

在屬員尤當效法者也當此農功已畢民力就閒業經飭行保練勸諭居民芟除蕪穢至於鑿石砌磴削平險頗力捐工費遴衿士中陳芝定耆民呂菊人董事興修完竣從茲化危險爲康途行旅共樂蕩平於王政不無少補云

城隍廟序

知縣

葉德芳

寧波

竊惟有邑則有城有城則有隍有城隍則有廟廟者城隍尊神所憑依而施其彰瘴之靈者也廟之立與己相始終神之威與宰相表裏一則理陰一則理陽

也然理陽者宰而陽或不受理焉宰有私也理陰者神而陰悉受理焉神無私也無私者陰陽之所交待以理也則神之世世廟食於茲也固宜攷茲之立邑始自前明成化間而邑令陳公栗初建茲廟至

國朝重修者有前令呂公國祐也越數十年而署令鄔公維肅復議重建工未竣而離署而闢門堂增廊廡使廟貌煥然一變者則係何公維新厥後宜修者不一次修者亦不一人其經歷久遠漂搖於風雨者莫若此次爲甚而余適蒞斯土見榱崩棟折心甚惻然

漳平縣志

卷九上

藝文上二十一

爰集同寅紳士商議重修工起於嘉慶己卯秋杪竣於庚辰冬初復率董事各捐資俸置買田畝以備每年祀費措置甫完而董事推功於余序以誌於石夫余何誌哉思余捐有薄貲以先斯民者邑宰之分也無足誌也其踴躍樂輸襄事者斯民之願也鳩工庀材朝夕計算以藏此舉者董事之力也余何功之有焉更無足誌也特誌其經始落成日月田之畝分多寡俾後之人知廟貌於今新矣而新者必趨於舊則後之新之者當猶夫今也而田者祀事之所須今雖

寡後可漸增能使神之所憑與神之所享相引於勿替此則余之志也而亦衆董事之志也因以爲序向來官員來往原無公館屢向城隍廟後殿寄寓殊屬未便知縣葉德芳自捐俸囑董事另購基地創建公館於廟之西偏分作前後兩進後節一廳三房前節一廳六房以爲官員行署仍交二十六福董事照管經理無致荒廢以傳久遠又公建本廟儀門左廊一廳一房崇祀觀音佛祖福德神像香煙附記

鼓山書院序

知縣 陳 塏 餘姚

漳平縣志

卷九上

藝文上二十二

古者家術黨鄉莫不有學州長黨正之屬以時勸勉化導而鄉大夫又簡其賢能而賓興之其秀良者固由是以觀感而興起其椎魯者亦得循謹寡過而不至相習於爲非人才之興風俗之厚由此其具也癸未夏余縮符菁城既下車覽其山川察其風俗大抵人敦節儉俗尚詩書八閩之中最爲淳朴第風氣初開規爲未備東山書院而外義學闕如子弟之習舉業者聞見旣嫌其孤陋而偏隅僻壤之間目不睹詩書耳不聞理義更或相習爲刁頑獷悍而不自知其

非余方竊竊然憂之欲與諸紳耆約四里二十餘社  
每社設立書院以廣教化而變民風時因公冗有志  
未逮適紳士楊君元德鄭君日麒張君起鳳等以創  
造書院事請序於余生等居和睦里安仁社二十餘  
鄉率多荒村僻壤今父兄欲造就子弟爰擇往來相  
通道里相等之安仁墟資壽寺左側坪地建造書院  
名曰鼓山將使子弟課文會友切磋琢磨於其際美  
哉斯舉也何其先得吾心乎夫德行道藝三物所以  
興於鄉也惇親睦族型仁講讓比戶所以可風也尊

漳平縣志

卷九上

藝文上二十三

師儒重道德端士習整民風牧民者之責也樹立坊  
表砥礪廉隅使鄉人薰其德而善良不肖聞其名而  
知恥則惟諸賢士相與以有成也而要非興學校以  
明教化不爲功今諸君能有事於此將人才之興風  
俗之美不於是鄉著成效乎吾願諸君敬慎以竣其  
事猶願四里二十餘社胥仿是而舉之以化其刁頑  
獷悍之習而登諸和親康樂安平之書則豈獨宰是  
邑者之幸哉是爲序

論



論陳二漳先生殉節處

教諭 林得震 永春

甲申變後陳二漳先生闔家自焚殉節事州縣志詳載之父老輩能言之而其殉節所葬之處則所聞異詞所傳聞又異詞余初聞殉節在縣西門內大坪頭有土堡其舊地即今歲貢生陳國瑞等祠宇是致仕以來即閉門隱居於此矣然余嘗讀二漳詩集皆黃石齋先生評定其吟咏多屬山村風景罕語及城市寄興尤在桃源觀於敘劉陽洞明府詩集謂余頃解組南歸留連於桃源修竹之間和木政靖詩亦云覓

漳平縣志

卷九上

藝文上二十四

得桃源買一邱意者如陶淵明桃花源詩別有寄托非必有其地也而州志則稱先生好佳山水居永安之桃源僉謂永安是其樓名非地名也則先生有終焉於此之意可知况墳墓在西門外坂頭鄉是殉節在邑西門內就近而葬於此似無可疑乃者蔡石坪明府纂修邑乘委余同事分派諸生採訪咸云土堡在感化里長榮山上舊址尚存子孫居是焉則集中有送家仲歸長榮詩可證所可疑者墳墓在坂頭鄉耳集中菁城旅邸對月詩有云水陸一百里別離第

二宵長榮至縣約有百里且旅邦非家也然謂殉節  
在長榮當自焚之餘家屬豈能無懼被逮而逃避又  
誰收拾灰燼餘骸遠舉合葬於坂頭鄉而諸生又云  
先生祖父墳墓俱在是則自長榮而來葬於是固宜  
究無一確見復囑再加搜採近得其長子金書所撰  
先生行實斷簡殘篇多蠹蝕之餘細閱之知殉節實  
在長榮書有記後謂是年二月出奔至次年冬始歸  
又五閱月方重理棺衾卜葬於田地之嵎則坂頭鄉  
又何以有墳墓要之千秋青史筆一死白臣心先生

漳平縣志

卷九上

藝文上二十五

素喜讀孟惟在舍生取義一言盡之而已餘又何論  
至州志所載或因集中有秋月遊永安桃源洞賦景  
詩而云然歟余於是有感也當世遠年湮文殘獻謝  
志乘久無修輯近在百數十年事尚搜討不足傳信  
況遠在二百餘年所聞所傳聞之異詞如此類者何  
可勝道倘從此擇不精語不詳以訛傳訛後之視今  
亦猶今之視昔明府所以慎重其事而余亦不敢鹵  
莽也夫

開建縣治記

土事 戴時宗

漳平本龍巖所轄地去舊治三百餘里俗恃遠僻習頑國賦民租逋負者衆公私患之成化己丑巖之父老蘓元輩白於通守李侯玠直割居仁感化和睦聚賢永福五里之遠者另立一縣以治之侯轉白諸司以請於憲廟制曰可下其事於福建巡按藩臬諸重臣覈之被命者往相居仁之小菁山水環踞川陸可通縣治宜其中具以復於是名其縣曰漳平設知縣一員主簿一員典史一員訓術訓斜各一員以治之

漳平縣志

卷九上

藝文上二十六

教諭一員訓導一員以教之歲輸國稅柒千貳百陸拾叁石賦役戶口叁萬貳千陸百叁拾捌口生員名數貢舉與諸縣等皆以爲成則而不變始領邑篆者南昌陳侯栗也旣至出治之堂施教之所先聖先賢之殿廡社稷山川之壇壝與夫公館廡舍倉庫廛肆之類皆未建立侯曰草創之難吾固不敢辭其勞然必得人以分其任庶可集事遂禮致民部郎陳公雍之子良曰功立於鄉邦道行於天下雖大小不同其有益於人一也茲開建大事吾子能相成之非功立

於鄉邦者耶對曰良不敏敢不敬共以聽教命遂擇日命工伐木採石建縣治於東建廟學於西前闢大街以爲市肆左建倉庫以貯徵輸立壇壝置舖舍建分司凡百應建立者皆建立之侯總其綱良分其任工食之費出於府藏及贖刑之金不科於民經始於成化辛卯春壬辰冬落成甫及二載而規制巍然一新且教養孚行享祀豐潔時爲都者皆莫能過衆方望其終惠大造不圖以內艱去任於今四十有餘年矣民化而淳神悅而安皆侯遺澤也邑士夫鄭君偉

漳平縣志

卷九上

藝文上二十七

輩相與言曰陳侯德被生靈功施社稷尚未有能志之者吾曹復不徵言以志之則百世之下究本求源者於何考據哉謀既協告於後令徐侯鳳岐侯欣然走書幣來愚請記按春秋之法常事不書而非常則書夫草昧之初區畫且難况百役並舉民不告勞而事皆落就政教又行乎其間收效大而且遠如此可謂非常之功業矣陳氏良又能協贊成謀是皆宜書之以刻示後人也侯由鄉進士起家去之日民遮道攀號至今猶仰慕不已云

築城記

戶部郎 吳仕典

漳郡據全閩之勝以控嶺表逮我皇明成化六載始  
闢漳平爲郡屬邑按地志去郡四百里東抵安溪西  
界龍巖南連南靖北亘永安山陸險塞遼闊不時流  
寇莽伏其間於是置縣治以扼潮贛之棧道規制草  
創而城垣未設宏治辛亥流寇突至爲民梗者屢因  
循距今四十餘載壞日以積故指漳平爲陋邑舟楫  
罕到商旅不肯遊市區索寞鄉老吏民與邑之著姓  
者每有荷擔之虞正德癸酉秋金華武義徐侯薦拜

漳平縣志

卷九上

藝文上二十八

來嗣下車與民休息汰冗費勤庶政興衰補敝尤汲  
汲於學校越明年寇復壓境侯躍馬提兵率驍勇直  
前寇遂遁民獲生全乃相地宜集父老士夫告曰王  
公設險以守其國鑿池築城此今日之急務卽命工  
具畚鍤築城垣甃以磚石擇耆宿陳文等董其工役  
城高二丈袤幾許里設四門以通往來南曰朝陽北  
曰拱辰東曰迎恩西曰偃武翼以樓宇隱然形勢之  
地也興工於甲戌春落工於乙亥冬侯又見邑之南  
河病涉者衆乃造舟爲梁以通濟之工亦繼竣始漳

平爲縣編戶僅有三千六百侯至勞來安集今幾倍矣地利之入視他壤爲饒山畚薯蕨芋葛足以上供而下給遂爲沃衍之勝而可處也幸得賢令爲之樹立生養具防守暴客有待使民得以就作息室家無警且歲時嬉遊足爲長治久安之域矣予知邑賴侯以興地益以人而重塵者爭欲歸梯航者爭欲來向之陋者日以減去索寞者日以阜蕃皆自侯始計其興作泊於畢事不獨衛民防患可法也而其變衰敝就功效亦何其果且速歟昔孔子之武城聞絃歌而

漳平縣志

卷九上

藝文上二十九

喜於戲若侯者其知學道愛人使孔聖復生過此寧不爲之莞爾乎凡作縣得人爲難幸得賢令而集事尤難幸得事集民不怨勞且頌其德不忘又難也今漳平之民旣幸得其所難得令因民之幸卒能興其所尤難宜其民幸而復幸不自己也邑太學生朱珏陳翀囑予記其事著侯之功以垂於後且遠云侯名鳳岐字文明

科貢題名記

副使 陳和 龍巖

漳平縣縣大夫薛侯蒞政之明年學校修舉百廢具

興時適予奉命南旋庠生朱君珏蔣君泰自漳抵巖  
謁予拜而言曰吾漳有學始自成化初南昌陳侯栗  
時方肇造草創百事咸賴成之未幾侯以內艱去人  
才碑刻未克就緒厥後繼其治者卒不能繼其政也  
宏治己未冬薛侯以科目起家來尹吾漳既至以故  
事謁孔子率師生往明倫堂首詢及邑之人才慨然  
歎曰學校王政之大端人才國家之利器碑而勒之  
所以示勸後人也今日有司之事有急於此乎既命  
工伐石爲碑上紀進士中紀舉人又中品第貢士發

身碑之長短廣狹舉稱其度卜日告孔子立諸學宮  
之左且循循善誘日與諸生講論經義雖臨大政未  
嘗或怠所謂善政善教侯其兼之珏等被侯教愛素  
矣敢干先生一言以勒諸碑首庶彰侯之成績於不  
磨予惟豪傑之士參天地而贊化育垂名竹帛與日  
月爭光碑之有無何與焉然則立碑以示勸者是固  
有司之責也以豪傑之士自待而不負有司之教者  
其諸士子之責乎吾以此待諸士子諸士子其亦以  
此自待乎薛侯名悅字民懌丁酉鄉進士家古淮

汪侯蒞政記

尚工部林

俊莆田

漳平始龍巖尾閩會而頰輔於潮成化辛卯始析縣理者弗恪效罔臻正德戊辰武昌汪侯宗程來爲令方是時賊璫盛啟賂門吏緩禍速化恣之爲漁獵取媚至民力匱以轉流侯渙收焚釋之慎示畏約示省嚴以痛梗右仁弱而撫摩之豪勢爲斂流爲復者數十姓無名委輸數數然土瘠民疲爲懇懇且爭有損上益下之道焉百廢籌緩急舉之大成廟修櫺星門修社稷城隍又修明倫堂建棲神重道則然也庠生

漳平縣志

卷九上

藝文上三十一

有課塾生有師繼其乏獎其修而登其可進興學則然也樹縣柵團鄉兵簡閱之禦盜則又然也皆節縮取辦惟常平艱爲之所則倣榷鹽議白之當道間一行之得穀八千餘斛比足曰止曰毋吾厲階業備荒之豫而毋啟濫觴之征人以爲宜侯狷而剛錦衣楊者賊璫黨也勢方爰侯繫其家人之專利者藩司吏怙勢挾賂侯發之部使者褫其役民則有謠鄉有虎侯誠禱而尋殪之民又有謠武平寇逼邑且入侯持弓躍馬率鄉兵蹴之擒斬數十寇遁去朝會故事人



役侯私募爲給龍巖乏尹羣言之當道必侯攝侯攝  
茂著懿聲遂載被殊獎二邑稱爲快侯書績天官陰  
陽訓術陳琪父老朱傑陳文等屬巖生林謙狀治績  
請記刻之石以繫侯思侯予監臨所取士旣知矣政  
隱約未詳漳遠也徐覈之始之自邑來者曰侯果良  
爲六邑最繼之邑之人言曰郡之人言同士夫言又  
同郡之守陳君宗禹來書曰聞有詢于淳淳果良者  
也治六邑最方始爲得人賀曾生元清林生汝復來  
言曰侯果良也漳人之心且勵嗣政非侯佞也予曰  
漳平縣志

卷九上

藝文上三十二

旣知矣抑不見夫負百里者乎始則矍鑠然繼則蹒  
跚然吾惟夫末路之難也侯可久乎曰可曰然則南  
之軫不可期漳不能侯久也昔秦人之鼎一千鈞一  
百鈞一十鈞令曰舉者與有差烏獲過之舉十鈞又  
舉百鈞又舉千鈞然則漳十鈞之鼎也侯將舉其重  
者二生憫然予曰人心也記之

遊龍濟巖小記

曾汝檀 邑人

廓齋子曾汝檀以侍養歸與同志諸子太學生陳文  
陳茂楠庠生黃誥葉應春楊信俞天衢陳應忠陳茂

松陳天賜李應秩陳應元陳思齊楊中行曾思魯朱  
孔陽陳守謙夏月泛舟歷三龍潭搜幽乘涼慨然有  
風雩之想龍濟巖上得斯石紀之續有至者將謂偷  
閑乎將以尋樂乎當有辨其志者云岢嘉靖庚戌歲  
六月初五日廓齋子曾汝檀書題

書風並序鑄迴石壁  
字並序鑄於石壁大

上

### 重建鼓樓記

知縣章述蘭谿

郡邑之設必高建麗譙懸置鐘鼓所以明刻漏謹晨  
昏示興居之節也平之有邑自成化之初年而鼓樓

漳平縣志

卷九上

藝文上三十三

之圯壞已極棟折柱腐舊貫難仍予蒞治之始即議  
新之於時軍務倥偬催徵迅急未能也越己巳之冬  
海氛寧息予視篆亦稍閑於是捐俸資鳩美材召良  
工諏吉日撤舊而重新之棟宇堅隆簷牙高爽視昔  
之陋煥然改觀庚午四月樓落成予具殽觴偕僚友  
南城黃允升寧都王君化幕僚錢塘俞鳴岡同登眺  
馬夏日初爰景物明盛城南一川溶漾東流西北諸  
峯環列獻秀禽聲水色足供悅翫予凭檻樂甚允升  
顧予而笑曰時詘舉羸古人所尤吾子當瘡痍未復

之餘而汲汲爲功築之計樓之未易也過之恒色憂  
今始落成而吾子之喜已甚亦尚有說乎予曰事有  
所自起時有所宜爲夫所謂時拙而舉贏者財盡力  
勤而圖夫不急之務也今不費民財不勞民力蠱壞  
之極順時修飭固非若新延廡作雉門之可緩也又  
焉爲古人之所尤乎况斯樓爲一邑之大觀而卑隘  
傾廢譬諸沈痼之疾不遇俞扁孰從而起之在昔未  
新刻漏不聞晨昏無節民惰不興女休於織男怠於  
耕今茲旣新氣象殷殷按漏鳴鼓清夜鐘聲子思盥

漳平縣志

卷九上

藝文上三十四

漱視膳親庭士思誦習孳孳鷄鳴蒼農扶犁刺破朝  
雲紅女曉窻機杼紛紜盜賊聞更而遠避工商乘時  
而取贏一樓之建而可以作新乎萬民允升瞿然而  
興曰有是哉斯樓之急也吾儕旣樂觀乎厥成請書  
以識之俾後蒞茲土者不忘作者之勤庶幾時飭而  
時新

重修儒學記

陳九敘 邑人

平學之建創自成化之八年其制廟前堂後治教休  
明人文赫奕視隣攘相伯仲焉迺堪輿氏欲少規前

制持並峙最勝之說識者然之而靡遑舉也丙午秋  
災回祿門焰廡折蕩搖什之伍則因廢爲舉正中興  
之一會而豈易易哉於時弟子員采前任姚江陳侯  
有更新意捐資以豎第力限於弩末廟廡堂齋祇豎  
其口已耳己酉春仲傅侯蒞平視學之構而弗飾缺  
而弗完狀愀然曰是獨青衿任耶遂鳩工庀材斥俸  
入益以贖鍰不數月一切所飭完者靡不翼如煥如  
云因以其業課諸生每給所贍資卽桂林地租若干  
隸於庠爲經久焉侯興學造士甚盛心哉夫茲學之

初開也以南昌之陳侯今之重興也以南昌之傅侯  
福星一路輝映後先其符合竒已顧學者學也君臣  
父子夫婦兄弟朋友之倫無斃斯實學也古聖王廣  
勵學宮設之官揭之明倫以典此學陳德行正容節  
修俎豆以崇此學鐘鼓詠歌餼廩課勸以鼓舞此學  
彼漸摩其中者當益蒸蒸懋勉口匪正言罔誦身匪  
法行罔措其大者昌明教化振綱植紀能使鴻名昭  
日月而聲施海宇次亦好修有聞列於君子之林我  
學柄肇倡布衣先生好古力行模範端矣循是海嶠

賢豪尤多所揚勵竊慕夫江門之正脈藉以少聆而後生蔚有興起顧士始未嘗不振拔而後稍靡也今按身心性命之申飭加嚴而剽影嚮獵聲華者何居掌故名物之功令匪闕而齒揖讓敦倫常者或不盡然橫經問藝褒衣博帶者不乏人而偉閎耀天壤姱節積厥躬者不數數見則士不與實學自命而文運亦因以少滯此甚非我聖朝勸學鉅典卽侯作興實意果若是眇眇已乎前修炳如取則不遠所願諸士實修實詣大倫罔圯在鄉滿鄉在國滿國覩畫棟之

漳平縣志

卷九上

藝文上三十六

巍峩而興仰止美富之思被優養之德教而勵溫飽不愧之志斯更新並峙選勝之盛事而後先竒邁食報不朽與然造士惠民俱侯天性彼其徽燾實政載在口碑者嗣有如椽之章闡繹而掄揚之又非余不佞所能罄勒云侯名文勛別號屏西登戊子進士徵余記者掌教事吳中沈君鼎司訓歸化夏君時正也

重修縣堂記

蔣時馨 邑人

嘗謂易至鼎革相次而得聖人立政之經焉夫革去故也鼎取新也不去故則不能取新而詩有皇父之

刺春秋有延廡之譏則又無取於革者載讀草詞而曰已日乃孚蓋已日則時事之既窮乃孚則民情之允協以此議革乃見聖人不得已之意怠夫草之既成則規模大備耳目一新故鼎之詞惟繫之曰元吉亨而已古聖人之重紛更惜民力何用意之深且遠也漳平自開設至今百有三十餘年其堂隍廡舍與夫學宮壇壝之建置大率漸就傾圮然以其時絀舉絀也不過因其敝極而補葺之耳惟縣堂及衙宇經前陽江施侯大興作而更新之一時若太學若富民

漳平縣志

卷九上

藝文上三十七

罔不捐金樂助施侯精堪輿其所規畫皆取諸陰陽家避忌之說使人可見而不可知故與時制迥異竟施侯遷任而其功莫就今侯震吾劉公繼其後欲與民相安於無事於是卽公庭之深濬及丈者培而淺之水溝之迂迴壞民廬舍者築而平之吏舍之遠在十武外者徙而近之東西二小甬便民出入者前毀而今復之中甬之戒石亭前撤去而今豎之坊凡神祠廩館莫不量加修飾使登斯堂者左右翼然如身臂之相使臨下赫然如脈絡之相聯是施侯未興作

之先事猶可諉而今不可諉也施侯旣興作之後衆皆掩口而今則忻忻加額也所謂已日之孚不在施侯而在劉侯矣會堂成劉侯以高尚行百姓相率請余爲記余爲之記其事如此劉侯名懷望號震吾江右吉水人僑居貴州思州府遂占籍焉以選貢任今官心地正大慈祥待百姓有恩百姓亦戴之如慈母褫身剛介不以非禮媚人亦不受人非禮之媚所自奉甚節約計修理之費皆節約之餘毫不取之民間因併記之

漳平縣志

卷九上

藝文上三十八

重修儒學記

蔣時馨

漳平故隸龍巖成化間始析置縣治遂建儒學維時草創之初尚涉簡陋歷宏正以來規制稍備迄今蓋百年餘矣間嘗頗加修葺類因仍苟且久之歲蠹月蝕而若或圯之也萬歷丁亥冬蒼嶽黃公以名進士來令是邑下車輒以興教化成人材扶植綱常培養士民爲首務一日視學睹其瓦墁碱甃題楹棗稅間多黷朽缺折漉漫幾不可支乃愀然歎曰居官者當視國事如家事寧有廢而不舉者乎况此乃國家育

才之地是誠不可已之役也遂捐俸金百餘兩購材鳩工陶甃削石度其前制之未備者始拓新之於是文廟兩廡明倫堂兩齋及泮池門楹垣墉欄楯咸赫然改觀矣諸生日雍容俎豆其間恍若棄榛莽而就康莊也靡不沾沾色喜乃相率請予記之余椎魯少文安所取爲邑大夫重諸生請益力余故爰述黃公作士之功爲諸生誦焉公渾雄博雅於書靡所不窺而才藻修姱樹幟藝林諸學士經生爭北面事之嘗以經術飾吏治每政暇晉諸生探討疑疾甄別筆實

漳平縣志

卷九上

藝文上三十九

維時人文駸駸登於大雅諭教守功令月試諸生公直儼然臨之且捐俸貲令膳夫供具如禮居恒履素崇儉侃侃勵節用以風多士多士且喁然向風焉蓋至是而知公作士之功不恆睹記匪徒靡文縟節以博藻績之聲而後爲愉快也公生平寬厚廉潔表裏若一諸所論議類鑿鑿以忠孝大節爲士民嚆矢政尚簡易一切與閭閻相安於無事卽壇壝倉廩武場咸登於新而民不知擾至若興利剔蠹燭弊釐奸又恍乎執軒轅之鏡而莫之或逃也者然則公其直追



古循良者哉余聞之論秀選士著爲令甲大都上之人實風之漳邑介在山陬獨公以名進士領符璽跡其展采紆畫又百餘年來所創聞者乃今學舍更新而一方人文之運日振作而恢張之多士生際斯時益當爭自濯磨以求無負於公則公之斯舉也其所係顧不重耶工經始於萬曆十七年八月閱期年而告成不費公帑而大功聿就是不可以無紀也公名櫟字司直別號蒼嶽江西金谿人

東山寺記

陳嘉議 邑人

漳平縣志

卷九上

藝文上四十

宋侯蒞任之明年爲崇禎之戊寅歲何舅悌先生同邑諸生相與建議於宋侯謂平邑卽僻處山阿然其山川之秀市廛之饒亦足以無媿他邑乃二百年以來之文物尚有鬱而未盡開者毋或其水勢突下少欠紆迴以至於夫峯迴則轉水迴則抱堪輿之言未必盡爲無當是在守土者之如意焉宋侯曰是余心也於是乃相地於蓮花巖之高處建立浮屠五級而以僧人達明任之既焚旣薙旣屏旣闢乃立崇基乃伐巨石已盡三級矣而以宋侯中考功法當調其

署篆者爲寧洋萬侯雖銳意有加而格於代庖日淺  
僅粗成三級未可壯觀庚辰冬舅梯何先生自北上  
復來乃睠然斯顧謂造浮屠者必合其尖柰何以通  
邑之仰虧此一簣之功乎則更命諸生有幹力者董  
其事而加毖焉堊色外瑩螺旋內轉晝則風鐸高懸  
夜則佛燈四照望之如卓筆案頭伸指掌上此人文  
之瑞也又以有塔不可無寺則於塔後建立佛堂一  
所佛堂之右則爲沛然堂士子居之佛堂之左則爲  
南軒遊人憩焉南軒之翼別爲兩房則以棲息僧人

漳平縣志

卷九上

藝文上四十一

沛然者與佛堂面於西南軒者面於南俯瞰城中僅  
荒烟一抹視溪流上下若一衣帶迴環扁舟往來則  
一葉耳山勢旣環四時之景俱備又以此山之腰舊  
有泗洲佛小龕則改建一亭焉以備小憩其榛之所  
未盡剪者從而剪之其途之所未盡闢者從而闢之  
春則賞其長條抽嫩新桐濯濯秋則賞其山容若洗  
月色娟娟士女連袂而遊者不二里而可至不嫌其  
路之遙也卽有興酣而命沽者雖立待而可須不隔  
於境之荒也余乃喟然歎曰茲山也未遇二君子開

創之先則牛羊之所踐踏牧豎之所樵採菑翳充塞  
荆棘叢生不過如灰堆糞壤崕嶮一拳耳孰有過而  
問之者而一經二君子創建之後遠近遊人遂以不  
絕如此則二君子創建之功其可少哉宋侯名聘蜀  
之廣安人舅悌名九雲泉之晉江人以署教諭事來  
吾邑者也謹記

施劉二侯名宦記

陳嘉議

崇禎元年二月博士弟子員及諸耆民縉紳等咸奏  
記於學使者曰邑侯施公信以嘉靖二年任爲浙之

漳平縣志

卷九上

藝文上四十二

餘姚人劉公鑄以嘉靖二十八年任爲直隸之宣城  
人遠者餘百年近者亦八十年然而至今父老傳聞  
猶習其先世之言謂其德澤有加宜尊崇俎豆以比  
於密縣桐鄉永永不忘乃山民朴鄙文獻久湮雖有  
悃誠因循歲月致使公道未伸大德莫報衆心慙焉  
況今聖天子出治維新百廢俱舉盍其俯徇下情崇  
之祀典以隆報施學使者旣報可於是蠲吉日爲神  
主以祀於學宮之傍縣令率諸僚屬弟子員致酒脯  
奉牲告虔不啻敬矣乃諸耆老縉紳又伐石崇隆以

爲八尺之碑余謂今之爲令而祠者固不乏人然皆陞轉而去冀其復來以邀福澤不則其所親昵之俾比之而私者也此卽肖像以祀而不可立於學宮之傍且公道已定無賴少年肆其恣睢而以府穢之戕毀之柰何以土木之偶代受罰也今二侯之政遠者餘百年近者亦八十年世與人而俱遠無福澤之邀比昵之私一旦議出公評尊崇俎豆於以比於密縣桐鄉其又何讓矣施侯於余大父當爲先進劉侯則與余大父頗有薑桂之契然余大父任天台時甫及

漳平縣志

卷九上

藝文上四十三

八月挂冠幾三十年台人始致其去思之辭此亦豈有福澤之邀比昵之私哉亦以公道之在人心固有所不忘耳施侯餘慶未艾今郡大夫屬其後裔仁愛威明行法無私海濱之民凡窮陬僻壤莫不含哺嬉遊以爲從古未見之神君此其所爲明德遠矣詩曰樂只君子德音是茂又曰淑人君子允懷不忘其斯之謂乎

泮池記

教諭

何九雲

晉江

予初至平見櫺星門外有窪焉狹而長瓦礫凌雜蔓

草莽生不稱泮池也因規而半之加廣焉累溪石爲  
趾若崖可以池矣然而不水不池也或曰是其土燥  
宜伐之以爲柔募人鑿之蹴牛耜之或曰是其理疎  
宜塗之以爲固則用牛蹄與人跡雜揉可以水矣然  
而不得水不池也雨過之後視其流之大者自外衢  
引而達於池之東南自內廟引而達於池之西北自  
明倫堂引而達於池之東溝之漱之得充溢種蓮而  
蓮發養魚而魚肥天時旣旱池猶能一鍾焉何子曰  
予過泗上有泉林焉是名陪尾之山其泉數十道珠

漳平縣志

卷九上

藝文上四十四

濺玉浮泠泠不竭泉之得於天者也茲者募人僦牛  
伐土築溝池之成於人者也有勉強之力焉有積累  
之勤焉士人之困於學而百倍其功者視此池矣作  
泮池記

縣學新置義田記

何九雲

天下事必待其力之可爲而後爲之則其間之曠焉  
而未逮者多矣且必待其可爲而爲之則力之未可  
爲而不爲彼固有以自安也然予觀天下事有其力  
可爲而不爲者亦已甚衆而孰知其未可爲而不爲

至於異日可以爲矣而竟不爲是卽其人耳吾泉中李文節自入仕有意倣范文正義田以贍其族而夙秉一介之節力不能也其族單鮮寥寥數人人月給米數升文正不爲多文節不爲少亦有其意而已學宮之有學田也以贍士也厚者千畝微亦以百畝及其弊也公入耗蠹苜蓿之食又視之以爲外府寒士未必有絲毫之沾然亦在乎其人之公私非其制則虛也平未有學田平之缺也予因諸生之以事來謝者三人共白金二十六兩請之同寅媿承朱君曰與

漳平縣志

卷九上

藝文上四十五

其卻之寧以其資爲義田廉其貧者而周之升斗何如朱君曰甚善杜公茅屋爲秋風所破乃云安得廣厦千萬間大庇天下寒士俱歡顏古豪傑志士言有大而非誇如是乎予又安問其可爲不可爲哉

新建陳布衣祠記

何九雲

平自成化七年始縣其時卽有大賢陳剩夫布衣先生來主教事至隆萬間始舉祀典以爲先生有功縣後學如唐之常袞得祀名宦又曰先生未官於朝也重□不如重道稱鄉賢爲宜因改祀於鄉賢祠有年

矣予謂先生漳人非生長於平者二祀皆未足以妥先生因謀之諸生選地於啟聖祠右聖廟之後建爲特祠竊謂有合於祀禮按先生以天順己卯六月上程朱正學於闕下今祠成適當崇禎己卯六月事會之符若有數焉嗚呼三代盛時論秀進士之典寥濶難稽獨其緒言存耳隋唐以降科舉之學浸淫日久先生奮然於祿利橫鶩之時其志欲立明師興正學以佐休明之治豈不勇哉然而習訓詁工科舉者名卿碩輔皆出乎其間而國家因之爲黼黻之助卒未

漳平縣志

卷九上

藝文上四十六

嘗乏先生必與之明天心之本然講聖賢之動靜革選舉之舊法考德行之上下豈非事之至迂濶難行而犯搢紳流俗之所姍笑者歟天順初元其去國初淳龐之習猶近也况我英廟銳然思治亦旣覽先生心圖以心可學否爲問使先生之說得行則士患德業之不修人安祿利之無慕其風教被至於今固無以異於三代之熙洽矣夫以文清復性之學諄諄見於試錄一序而聘君方用薦起然文清未幾去位聘君陞見輒辭則知倡明聖賢之道於後世因循流漸

之日固未易也孟子闢楊墨韓文公蹴蹂佛老於無人之境亦爲用空言爲功先生不嘗汲汲自明爲救世爲奉天耶天下後世有志之士知科舉之外有所謂正學者何詎非先生力乎先生疏崇正學以逮教平中間又十餘年其教人之法必一一有其節序惜文獻湮滅已不免於子衿之詠獨於故志中得所爲釋奠先師文咨嗟感歎於深山士子慾心未動良心未喪不爲功名利祿記誦詞章之所蕩壞嗚呼今之士子然乎否耶然平先輩之用心正學者若曾公汝

漳平縣志

卷九上

藝文上四十七

檀陳公九敘蔣公時馨豈非聞先生之風而興起者哉先生爲我皇朝理學大儒人皆知之不具論論其所以明學校之正教者有取於先生以教天下後世教平之意也因礪石記其歲月爲迎送神曲而使諸士奏之

荒壘兮大海龍穴兮玉洲徘徊兮不見儼四盼兮  
中流鬪春筍兮爲耒耜冬蕈兮爲羞羌鳴絃兮與  
語昔深山兮曾畱其一

濯髮兮溪干正襟兮山舍紛考擊兮臨風翩然逝



兮神之駕鎮海兮高樓乘舟兮直下鐵關兮玉匙  
耿予心兮中夜 其二

重造舟梁田記

何九雲

造舟爲梁其來已古閩溪延建間多創之而立夫爲  
之守以候溪水之不時而司其維解漳平邑龍停山  
左櫟林壩者居於水陰兩岸人來往與波流相織當  
舟梁之壞而未立土人造小船十餘待渡糜民間金  
錢無虛日蓋考之縣故梁始於正德九年至嘉靖十  
八年凡四造中廢者久之今上崇禎間前令徐公復

漳平縣志

卷九上

藝文上四十八

之高公修之未幾而裁其守者溪水暴漲一夕亡舟  
之半乃亘溪架木高出溪水上丈餘辛巳春水大至  
木以盡亡謀之於官帑則告竭予每出視諸渡者若  
無當之卮矣因集諸生陳樞等謀之曰梁之費石趾  
鐵鎖爲大今獨舟亡耳趾若鎖固在也度爲舟當三  
十二方舟爲一架鋪以木板翼以扶欄得白金九十  
兩可成也余因倡率諸生共爲之造於是年五月乙  
未成於六月辛未絲毫不及衆工良且速梁成而人  
猶未知也復爲之計曰梁久廢百年幸而復設裁其

守者一夕亡去不知所屆梁雖設而守者無資猶之不梁也復薄涓脯臍之入倡爲之田以食守者庶幾永有此田亦永有此梁其他修補長策則資於往來舟楫如延建之利有曾運使之縣故在梁與田成於雲恐其久而復廢書麗於學宮之壁使來者有所徵或謂何子曰子爲沛然堂於東山之上使僧居之其爲之田也如釋氏信施之說福田利益與余曰謝客兒沈休文之流其於空教深信而佞之者也淵明東

漳平縣志

卷九上

藝文上四十九

林則與慧公爲山澤之游而已昌黎蓋嘗闢佛矣乃從大顛往來眷眷若不能捨者始予登東山見長溪東下縣治虧疏乃與巴蜀起莘宋公因山爲塔以爲風氣之助繼復與二三子考卜棲止經畧其地精舍立於後講堂敞於右軒櫺疏於南香厨毖於側伐材陶瓦不以一所假諸榛園菴羅之居以使人士登高覽物而相揚較於此也牡籥掃除之役不可以無人空山之邈郊野之曠非俗人而能任之將託之沙門以安其務一餐不足以嗛其腹則彼且持鉢而逝矣

予之爲之田也使僧食焉而爲吾勞服其事二三子之有以講德攷業至於堂上者則祗林之侶爲之焚松枝淪石泉設清几宴橫琴吾徒得以流觀極聽息其塵躁莫不一日千載曠然俯仰於萬類之上非竊竊焉所謂信施之意也若有高僧卽事蕭散山澤之交則亦可矣其有津心無生之教理忘空有口談圓密彼自道其道非予所得而聞也非予所得而佞也田若干畝歲入若干稻價凡白金三十一兩予畀金二十二田主許氏以爲講堂之資義之大者以其餘漳平縣志

卷九上 藝文上五十

充焉是田也官毋或括僧毋私鬻豪毋妄漁書以勒之堂右

遊龍壩南溟記

陳六韜

二漳山人居不樂問遊於爾綱爾綱曰蓬瀛之北有龍壩龍壩下行數十武漸聞鄉先生賦景蓋有南溟浸月焉則此地矣於是榛林廣野烟雲闔漠東則紆紆然磷磷然如率然之在常然西則峭然如壁踞而立拱而翼石崖北構而南折援薜荔躡危屐飛鳥絕塵跡滅至則盤盤然鬱鬱然割然天光如墜九重之

峻如入武陵泛桃源穿九峽如登如覆如吳太子觀  
濤於廣陵之曲浩浩瀆瀆汨汨怳怳而邳然足以駭  
也如六馬之奔馳蛟龍之躍如怒風之摧折木也如  
雷之轟電之磕也杳然而坐劃然而嘯如澹滌手足  
發皇耳目如濯髮齒澡五藏翛翛然而忘人間世也  
且夫天地之間水石之變何可極言苟可以寓其曠  
懷靡不欣然有得是以昔人觀於几榻之內見山水  
涯谷波文上下會心耳目之前故斥鷃控榆枋而鵬  
發於北溟雖小大之至變而其自適故皆若是又况

漳平縣志

卷九上

藝文上五十一

南溟之觀乎哉二漳山人喜居又數日遂從二朱氏  
遊其地從余者一人從二朱者五人計九人熟識其  
地者三人下而觀者八人登而望者一人先去者六  
人坐石而語徘徊而悵眺者二人然後寒谷鳴白水  
出雄風颺陵山靈動色吁都哉而後乃今知南溟也  
爾綱豈欺余哉久之二漳山人歎曰噫吾因之有所  
感矣吾聞之父老曰往庚辛之年撫馭矣善萑寇猖  
蹶辟難者填集龍壻之間動以百計食不皇突帶不  
及結坐卧不遑寧席今而吾儕得相從於茲嘯歌笑

傲聯袂分風無所掛滯於胸中茲非其幸與又安可不爲之記耶嗟夫士君子處不化俗出不匡時欲從容樂此得乎迺前事可知已遊何容易

松關吟社記

陳六韜

距觀世山約五百餘武有山鬱然峙石馬之上流有松焉約百有餘株護山居而環之入其中不峻而高不闢而明不幽深而邃余及二三兄弟自觀世山房來集殊覺有勝焉者因字爲松關吟社爾時朋儕之杖屨過余及見聞隨喜者莫不以爲勝也人情當其

漳平縣志

卷九上

藝文上五十二

始得靡不欣然有當於其心矣勃兀紆迴窈曲遼曠爽觀於物雲移水流月生潮擊霜飛風湧坐祇陀林是林是日是壁是空艸樹纖毛但有形可喜可悅種種無量迨其屬厭耳目未更而視聽易之矣昔之所茹一朝焉吐之弗怪而余二三兄弟之始集於此其以爲勝也固宜且夫地亦何常之有滌之瑯琊柳之愚溪鈞鋤潭皆將沒於荒陬莽蒼之中而幾得之臨漢上以望峴首蔑如也弔山陰之禊亦已化爲斷蘚湮苔矣右軍固曰是徒陳跡雖叔子亦虞滅沒於此

山也而乃今知之何以故余輩去觀世山房以來集於此是宜人之亦共詫爲勝也余與以登季玉偕殆十年所矣風雨晦明毀譽得喪莫弗共之其又何擇處焉余旣久困於時落魄不能治家人生業日惟旦暮之資是急住亦生心不則席煖之不遑也茲歲頗登鄉隣之富人貸我粟十餘石可少紓內顧之憂計得以其隙肆力於三經諸子左氏司馬子長文詞而靈均之悲宕南華之神異昌黎師之竒崛及柳州兩文忠之倫皆挾而從之游至如近世太倉濟南之後

幻若幼元深若宏甫靈若太穉奧若道圭咸將游焉以自廣每一展卷松風習習從兩腋生若不知老之將至亦幾忘其不合於時也然而逞歲交游去我者半雖以季玉之親且周亦會其家難時往時來殆將遽廬視之矣此於觀世山房何如耶雖然物理固當如是也因以爲之記

漳平縣



卷  
十九  
下

補  
編

漳平縣志卷九下



藝文志下

記下 碑 啟 引 祝文

詩 賦 銘

記下

新置學田記

陳天達 邑人

政莫大於教教莫急於養顧言教必於首乎四民者重之言養亦必於首乎四民者先之乃今之爲政者類以增戶口爲能以善催科爲最視興學造士諸本

漳平縣志

卷九下

藝文下

一

端直謂緩而不切高閣束之矣嗚呼德惟善政政在養民而於首乎四民者漫不加之意是未達政本也曾謂之爲政乎我查侯以兩浙名儒司牧平邑甫下車卽以興學造士爲首務見學宮傾圮捐俸謀新之其他興舉稱是一皆前人所不及爲不肯爲者而侯獨毅然爲之邑人口碑具詳無容縷述惟是荒殘之餘顧諸生爲貧所困愀然曰若操尺幅晤咿圭莖間者疏水或不給將無所藉以生何暇力學然是固吾責也因又捐俸四十金爲置田若干畝以續章縫之



食使蓬藁之士舉勿恤於饘粥焉吾於是歎侯之深  
達政本能□其大而務所急也夫人一行作吏遂忘  
其本來於韋布不□蔑視也孰能捐己所有以惠之  
如我侯者乎且侯之自奉約嗇尚有寒士所不若者  
而捐己益人無難色且無德色此侯之所爲益難而  
非僅深達政本之足以盡之也平邑學田之置前此  
闕如崇禎間何舅悌太史來署教始以束脞資二十  
六金充置學田其爲之序有曰學田以贍士及其弊  
也公入耗蠹首蓓之食又視之以爲外府寒士未必

漳平縣志

卷九下

藝文下

二

有絲毫之沾然亦在乎其人之公私非其制則虛也  
其言如是乃其所爲田亦幾不可問矣今侯能捐己  
所有以厚士而後來或有私之者其賢不肖之相去  
爲何如哉吾故推其意而紀之俾後之沐侯惠者知  
所感焉

學田記

曾炳  
邑人

我閩自甲寅之變雲擾波揚三閱朞始復覩蕩平然  
反側未安創痍未起蝟聚蟻結尚未盡解散數十城  
亡絃誦聲者又幾易星霜也今山寧海晏間歲而再

歌鹿鳴聯翩鵲起類宮一勺水方將養潛鱗奮健翮  
以爲邦國光實惟我總制姚公之賜公以文武全材  
起家名解來典藩司已而

天子謂日南重寄非公不可

特授節鉞制全閩其戡定撫綏威德所屆凡在寓下類  
能言之而莫能盡之也乃於投戈之餘卽爲講藝之  
舉旣教誨之矣而又飲食之通計閩中郡邑爲學宮  
六十有六各捐金有差購產以贍貧寒其發給平庠  
若干金置田若干畝惟我查侯猶慮奉行之不力經

漳平縣志

卷九下

藝文下

三

畫之弗詳或歷久而田畝削於侵疆斗斛虧於去籍  
有辜上人德意也遂屬記其事而麗之學宮溯閩自  
唐宰相常公袞爲觀察大興學校士始知學自是人  
文雲蒸霞蔚而立三不朽者後先接踵皆日星麗而  
嶽瀆尊今去常公千餘載猶尸祝不衰然當時特稱  
其興學耳未聞於常廩之外別立學田以嘉惠後學  
於無窮也今我姚公居尊體卑推貴及賤爲極盛之  
事施至渥之恩俾我後來多士毋以饘粥困其思毋  
以升斗窘其志得自感奮磋磨以彙征

天家供舟楫鹽梅之用者皆公所培植也此其有造於後學視常公似遠過之炳起家平庠備悉平士當凋瘵之餘多蠶鹽不給者今親見我公之周澤覃敷既爲吾閩幸而尤爲吾平幸也於是乎書

### 重造浮橋記

林本姓藍采邑人

單朝過陳眎其川無丹梁以爲廢先王之教而逆知其必敗國僑相鄭濟人以乘輿孟子謂其惠而不知爲政然則橋梁之造誠制治之大經而便民之急務平邑俯臨青溪溪之陽爲桂林壩人烟鱗駢物華輻

### 漳平縣志

#### 卷九下

藝文下

四

輳蔚然與邑治相望故日用所需薪蔬果蓏之屬兩岸互相貿易輕舸小艇往來如織先是編役以渡食餼於官民猶稱便未幾裁之於是熙熙攘攘糜民間金錢無虛日考之邑乘明正德九年邑長徐公始造舟爲梁鋪以板纏以鐵時當昇平爲費不貲民於是乎無病涉惟是溪納巖寧二邑之流水水勢衝激春霖秋潦維解失時則波臣或負之而去故興廢不常靡有經久邇有橋以來至我

國初凡七締造或間六七年而一造者矣或曠百載

而未嘗造者矣要其造也非其時之康阜則司牧之勤恤民也其未嘗造也非其時之凋瘵則司牧之墮乃職也然則是橋之廢興民風之慍阜吏治之純疵胥於此焉驗之豈細故哉橋圯於順治丁酉迄今幾三十年未聞有議復之者雖然橋之工費半在鐵鏈橋圯而鏈存猶有待也甲寅之變兵戟洊興民間寸鐵搜括無遺於是以百餘年之遺鏈悉化而爲海鏢山鐔嗟嗟是橋之振興寧復有日哉幸我邑侯查公蒞任蒿目津渡惻然動念卽以復建此橋爲己任然

喪亂初平公私告竭因捐祿鍰爲士民倡擇父老之可任者使董其事不用符牒文告科役編民工疇其直民勸而趨而積年久曠之盛舉不亟不譁譚笑而集謂非侯之仁心爲質才畧超羣曷克辦此夫前之人所不能爲者侯毅然爲之前之人不能爲之於事半功倍民力稍紓之時侯毅然爲之於兵燹銷殘瘡痍甫起之日且又不聞拂民所不樂強民所不勝以務遂乎一己之所欲爲也易曰通其變使民不倦神而化之使民宜之查侯有焉因以知古人以橋梁覘

治道治道果橋梁所能盡哉然其濟人利物拯溺亨  
屯舉視諸此矣故君子以爲觀侯橋梁之造而三年  
間之善政可以舉一而概也是烏可無記

朱子祠記

汀漳龍道 單德謨

漳爲朱子治郡故屬邑多祠祀焉平特闕以設邑肇  
自有明未之及也雍正間學博蔡君復且遴地於邑  
之東山始構數楹以祀以其鄉之陳剩夫先生配左  
室則妥文昌甚盛典也諸生以時講學會文其間二  
十年於茲矣余以戊辰夏觀察海邦輜軒抵平聞有

漳平縣志

卷九下 藝文下

六

朱子祠陟山拜謁見其規制多缺畧欲治之爰捐俸  
以爲之倡屬邑令趙君崇文司鐸官君偉曾君應選  
偕邑之髦士共襄厥舉而委明經朱生陽等董其事  
越歲工竣來請余記余惟朱子發前聖之微言集羣  
儒之大成而其學不外致知力行主敬存誠今祠旣  
增修歲時釋奠之餘諸生仍講學會文其間將登朱  
子之堂必思志朱子之所志學朱子之所學而以知  
行相砥礪以誠敬相切磋以聖賢爲必可學而至不  
徒習爲獵取科第之文斯於濂洛關閩之心傳一以

資之亦不虛今日修葺之雅意不然雖日取先賢之祠而塗墍之丹雘之究與羽流緇客嘗飾梵宇者無異於身心性命何與也諸生勉乎哉昔朱子守漳嘗遊平之聚賢里歎曰後必有真儒出至明果有陳剩夫先生與北溪先生後先輝映迄今雖人往風微未嘗不流連愾慕想見其爲人余觀平邑山有蓮花石鼓水有象湖鰲池秀靈之氣必有所鍾大儒之興間世一生當更有繼剩夫而起者高山仰止景行行止雖不能至然心嚮往之余於諸生有厚望焉諸生勉乎哉若修祠起訖之歲月及捐貲之姓名董其事者自能列於牌陰乾隆己巳季夏記

重修縣城記

傅維祖

邑有城垣固圉衛民厥維要務邇漳平縣城創自成化成於正德歷今數百載或頽一隅或崩數處或置而不修或修而不力予蒞任斯邑目擊情形卽慨然有志兼承憲令飭修遂於丁巳之春問磚於陶購木於山取石於溪命工召匠拮据經營領公銀以理其□網竭綿力以治其細目謹按城垣四面爲雉堞者

四百三十有三爲門樓者四爲水門樓者三爲窩舖者四圮者建之壞者修之需用之料大磚三萬六千六百一十有八小磚六百瓦二萬一千三百有十石子爲觔五十五萬三千三百石灰爲觔六萬五千二百四十草爲觔一萬二百有五十編壁宜竹計担三十有二石條爲塊計四百有五大杉三十有四中杉五十有四小杉一百六十有六松板一百有四十需用之工木匠二百一十有一鋸匠一百四十有一竹匠一十有八石匠四十有四泥水匠一千三百有七

小工三千八十有一施漆之工七需用之銀領諸藩庫者二百六十八兩零捐之養廉者二百五十六兩有奇起工於五月之朔告成於九月之朔落成之日登高遠眺四圍山色東有銀瓶西有龍停南有龍岐北有石鼓羅列環拱錯落增輝雖彈丸邑不成雉堞一壯觀哉

龍亭改奉龍門書院記

傅維祖

一人立極於天下雲漢爲昭天下統治  
一人乾坤起色蓋

天子居神京之內海甸要荒難瞻  
鳳表故下土矢虎拜之誠省城郡邑特設

龍亭屆大典之期則虔奉公所而九叩山呼處尋常之  
日則端設

清宮而兩階肅靜平邑

龍亭舊在庫後移奉於關帝廟中覺非所宜歷任諸君  
子商所以易之而苦無其地余抵任亟謀之城隍祠  
之西向有龍門書院乃吾鄉范公諱廷謀者攝篆漳  
平時所建也房宇無多課業漸稀去歲新建菁城書  
漳平縣志

卷九下

藝文下

九

院於佛仔山上師生移就而請業焉余因謀之紳士  
曰是院也可以供奉  
龍亭乎夫建宇以造士爲

朝廷培養士類前人之志也今造士旣已有地卽以此  
宇敬奉

聖牌示民以尊

君之大義亦不悖乎前人之意也諸紳士咸以爲宜於  
是修葺改觀丹鉛黜堊行見體製軒昂恍若居中而  
制外規模整肅居然率土以來王矣雖然是基實□



自范公雅意不可以沒就其左廡另

西□

廟而出入僧人朔望奉其香火亦兩便之道也併□

後之溯源者有所考

### 重修關帝廟記

傅維祖

蓋蘭室葯房已屬巷衢之雅望而花宮仙梵更爲城市之雄觀若非加意以興修亦何新之不舊果爾真心以補葺又何舊之非新平邑地號龍門山圍雉堞民居稠密連烟火者千家神宇蕭疎壯巍峩焉兩座城隍祠建隣南市洵爲漳水之砥流關帝廟創自東

漳平縣志

卷九下

藝文下

十

門允作菁郊之關鎖調風和雨悉依二聖以扶持福國庇民咸賴兩神之赫濯第隍祠經前令之勸輸堂階整肅門第軒昂已宴飲於落成若關廟應現任之經營儀從傾頽簷宇剝落尚程工之未逮茲者捐薄俸以作倡喜襄事之多從欽惟  關聖大帝迺聖迺神允文允武自古英雄稱公稱王未有稱夫子猗歟超哉從來豪傑卽正卽直如斯卽聖賢蔑以加矣高人逸士動輒長揖傲公卿若美髯公之遺像在茲自然稽首孝子義夫無過一方隆俎豆乃普天下之昭

承如是莫不感心今

朝廷賜祭春秋追封祖父誠千年之盛典在微吏虔  
參朔望綏撫人民實一命之初衷棖桷重新丹鉛烜  
赫從茲畫棟雕樑與隍祠之飛翬並峙行見金甌玉  
燭慶菁城之福曜長光迺若勦事督工則陳蓋韜李  
協五許愧芳李秀榮曾廷芳陳芳其住持僧人則定  
眉併記之

修南門臨溪道路小記

傅維祖

自紫陌塵飛那曉作亡牢之補揚州月白不知吹何

漳平縣志

卷九下

藝文下

十一

笛之聲此皆春堤芳草而鳥道蟠雲者也平邑城南  
外臨深溪古岸高數十丈城脚有路通上下勿問修  
之何人第世遠年湮土崩石潰險仄不平往來苦之  
况屬城市通衢摩肩擊轂不知凡幾非亟爲之修則  
城上之孔道旣已平平而城下之長途不見蕩蕩未  
爲善策也因捐薄俸以倡邑之士庶亦樂爲之和迺  
召工人就溪取石倚岸築砌高不數尺鋪平其上是  
役也費省而工成勦事之呂菊人與有勞焉從此示  
我周行映桂林而生色高才捷足按雲路以先登亦

一快事也故記之

修創龍江橋渡記

傅維祖

漳平城外對望者爲桂林龍江隔之非渡莫濟淵深  
涯濶橋不可石因作虹橋於水面計船則三十六隻  
維以鐵纜兩岸人家一川風雨往來甚便但長泊中  
流歷久不無賴於修葺余用是審船之朽爛者庀材  
以補之鍊之殘缺者煉鐵以續之然遇山水駸發解  
纜分船以避衝擊臨河者未免興匏葉之嗟小艇問  
渡又恐有傾覆之虞爰捐己力造巨舟二木取堅厚  
漳平縣志

卷九下

藝文下

十二

工求牢固俾接踵問津得以穩坐無憂可以濟虹橋  
所不及渡者記之

東山書院租額記

汀漳龍道

楊景素

昔范文正公舍田五百畝而弗有以爲姑蘓學宮至  
今鑄石立祠無不頌公嘖嘖此地猶范文正公有之  
使當時自私而傳諸子孫由宋至今不知其凡幾易  
姓恐非范氏之有矣故李九我先生謂范公之不有  
正范公之克有也余恒誦斯言亦欲告當世之有力  
者使不私其有乃長據所有耳歲乙亥余奉

簡命巡視汀漳龍龍之屬邑有菁城者山秀水清冽人文蔚焉邑令曹鑰謀所以養育而栽培之乃偕學博薛宸翰柯玠倡捐清俸建書院於邑之東山門堂壯麗學舍周廣聘名士招俊秀日省而月試之亦可謂盡心者矣猶慮書院之膏火未有也詢知舊書院有租八十六斗船橋租三十斗又昔有蔣君宗海者施佛寺租四百七十四斗寺久廢他僧混管有明間宗海同譜吏部蔣公蘭居告官清回因謀紳衿撥廢寺租合舊院橋租盡充書院膏火事聞於余余深嘉之

所謂不私其有所以長有者乎既有當於余心不可不共成之余捐俸百金置租四十斗以益焉惜規模甫定未及充擴而曹令逝矣且夫善作不如善成善始不如善終前之所以重有賴於後人也新署令衛克瑋有志育才課學講業猶黽勉不倦復捐俸修路砌石開自東山寺南繞塔而行平坦爽塏直達縣城可以遠攬溪山近瞰村邑不特賢闢義路之光亦爲遊覽者一勝也余又聞而嘉之以爲是皆志范公之所志而不有其財不有其力謀所長有以成前功

而垂惠於邑人者也余既喜其事之有成又恐其久而廢也飭將租額坐址勒諸貞珉又據縣詳垂久章程書院田租官不收掌役不與聞僉舉誠實董事輪年收租專供延師修脯斯議可久并書諸石

重建儒學記

知縣 傅國勳

漳平 廟肇建於成化八年其制廟在前堂在後萬曆丙午災己酉重建廟堂並峙

本朝修自康熙甲子歲遠年深棟朽柱蝕不堪補葺乾隆丙子余承乏茲土仰圖整理未敢輕舉值弟

漳平縣志

卷九下

藝文下

十四

子員信青烏家言爲科舉計羣請重建是可因機而鼓舞之乃與學博陳公煥世商勸助豐贍者施財幹濟者効力甫成議而陳公以內艱去事復寢適庚辰秋司鐸鄭公良翰來更共商定厥制量移於左鳩工庀材余朝夕督視不敢懈於是鄭公同項公思趙尉明山日偕諸董事共葺厥事而明倫堂緣新址遜其右並重建焉咸與維新甲申正月釋奠告成事諸生雍容俎豆靡不欣然色喜爰進而勗之曰廟之新修豈徒爲科舉哉程子云學以

道爲志人以聖爲志朱子云不是科舉累人自是人累科舉閩自楊游得傳聖學於濂洛南來大儒繼承日盛子朱子集其成眞西山衍其緒今從祀廟中十有餘賢而北溪陳安卿爲朱子高弟固漳郡人也平非漳之舊乎有志者可仰俎豆思奮卽以科舉論眞西山非廷對第一乎諸生入廟思敬近文章砥礪廉隅尊聞行知而進於高明光大乃不愧駿奔走在廟矣若夫獻俸助金皆職分所當爲且稽闕里廟制亦多未備蓋有俟也謹紀新修

漳平縣志

卷九下

藝文下

十五

大概勒於繫牲之碑

巨濟橋記

學政司經局洗馬 官獻瑤 安溪

楚衡傅公宰平邑八年德澤涵洽庶績咸舉邑城南九龍江江水環繞舊有文昌橋濟渡風饕雨噬驚濤擁木石冲鬪修而輒壞爰籌爲可久計鬪西山龍鱗松與水相宜僱匠造舟堅緻自邑東岸橫亘櫟洲釀水爲二十道舟浮其上爲橋十八架皆兩其舟爲舟三十有六聯以連環翼以扶欄又舊有分派舟子守橋之累於是置田產以給橋夫工食並歲修費亦有

所資共白金七百有奇先自捐發其半民樂□□□  
經理而孟冬成邑人感公之德名曰巨濟橋濟巨川  
用舟楫亦如是橋也橋東樹木牌曰文昌巨濟合舊  
名紀新德西樹木牌曰櫟渡長虹符仙讖兆狀元相  
與頌曰九龍珠光水滙菁漳傅公澤洽造舟爲梁長  
虹櫟渡文運發祥巨川永濟民不能忘請余記於石  
碑踵其美者爲傅公國勳字宸贊號思齋湖南壬子  
明通進士清泉人佐其事者少尹趙明山浙江山陰  
人乾隆癸未陽月

漳平縣志

卷九下

藝文下

十六

城隍廟記

知縣 何維新

邑有城隍所以護國庇民者也不獨邑之人賴之  
卽凡宰斯邑者間或禦災捍患俾士民安堵亦莫  
不重有賴焉然廟貌不肅非所以崇瞻仰而壯威  
靈菁城自成化始爲縣治溯廟之初建始於前明  
邑令陳公栗其繼而修葺也則惟

國朝前令呂公國祐迄今多歷年所矣垣棟不無傾  
圮乙酉初冬署令鄔公維肅興議重建爰舉襄事  
者十人第甫經始而卽離署工程尚未就緒杪□

□余蒞茲土爰捐薄俸竭力董率由中堂而兩廡由  
□兩廡而土門并後堂增以樓閣俱煥然更新其後  
□堂之右另闢新門以便出入土木之費頗屬浩繁  
□幸各紳庶踴躍樂捐而襄事十人悉真誠繩勉茲  
□已落成非但足以崇瞻仰而壯威靈卽邑中人與  
□宰斯土者亦皆沐庥於靡旣矣爰將重建始末及  
□樂捐紳庶並勒之石

火神廟記

知縣 劉嘉會

周官大庭氏壺涿氏牡槀氏各有司存凡以爲民捍

漳平縣志

卷九下

藝文下

十七

災弭患也今

國家有功德於民則祀之凡山川雲雨皆是蓋明有  
禮樂幽有鬼神咸秩無文莫之敢廢漳平設自前明  
祀典具舉傳曰淳耀敦大司火者也知必有神焉主  
之矣茲邑無廟曩之蒞斯土者非不暇也蓋有待也  
邇者闐闐居民不慎回祿歛起予肅衣冠默爲之禱  
應時而息始知傳記所載迓風噴酒之說亦第神其  
說爾方今六府孔修凡政在養民罔不釐舉則捍災  
弭患神之有廟也宜矣夫事莫難於創謀夫孔多如



彼築室於道邑雖僻小然日擊爰威爲民憫且懼焉  
乃買地於城之北捐俸以爲之倡不日而成棟聖方  
新中設幄座衣冠儼若蓋祭有祈焉有報焉有由辟  
焉神所式憑俾民知所美報官斯土者有所厚望矣  
廟立於此其方爲坎坎者水也配其用也正位於南  
其向爲離離者火也昭其德也云爾迺作神之歌曰  
瓦縫魚鱗紛邈迤人登春臺宛如是烟火無驚宅近  
中坎坎擊鼓陳方旨靈旗掩映不盈咫雲車風馬紛  
來止乾隆丁酉仲夏吉日

漳平縣志

卷九下

藝文下

十八

□新建崇聖祠記

劉嘉會

先師祖考舊無祀元至順始封叔梁父爲齊國公至  
明嘉靖九年議者以顏曾配食廟廷而其父並列庶  
卜又伯魚孟孫氏復無祀乃始有 啓聖公祠以顏  
曾之父及伯魚孟孫氏配食周程朱蔡四氏之父從  
祀焉至我

宗憲皇帝龍飛之元年追封五代自木金父公以下  
並爲王改 啓聖爲 崇聖祠而益以橫渠張子之  
父設主於廡歲釋奠於 先師儀亦如之而無樂堂

哉皇哉誠超百王而制爲鉅典矣茲邑有學地當闐  
闐之衝 聖廟舊制其基址前後高低宮牆疥聖泮  
水泥淤余爲鋤平 廟前街道旣翼扶欄於其前又  
植崇基於其後且於東西兩廡之外鋪磚砌石可以  
永久無滋蔓草豈徒爲瞻觀云爾哉及行事於 崇  
聖祠下則面頹垣環蔬圃齋後一隅烏鼠宵行僚屬  
幾無容足所余心蹙然矣

國家建學明倫所以型囿羣髦端性原而立政本先  
河後海義在於斯况夫追崇所生當思改絃易轍奠

漳平縣志

卷九下

藝文下

十九

厥規模寧惟是因陋就簡僅以補葺畢乃事乎明倫  
堂後地頗爽塏舊有鄉賢名宦諸祠歲久黹朽幾不  
可支爰改作以爲 崇聖祠而建名宦於祠左剪荆  
拓地繚以周垣庀材鳩工陶甃泐石閱三浹辰而厥  
功告成其齋後 崇聖舊祠則改爲節義祠而以節  
義祠改 天后宮一轉移間位置較爲攸宜體製頗  
覺稍合而余心亦庶幾其少安矣嗚呼萬物本乎天  
人本乎祖今

聖朝尊師重道

御墨流輝則推崇所自始余又何敢以努末辭繼自今  
溯洙泗之發祚而仰淵源之衍慶則煥爲文章不至  
數典而忘祖尋條而失枝巍科鵲起余更慰厚望焉  
矣

伐檀書屋記

訓導 鄭振圖 候官

今使拓百弓之地庀千金之木召工十年而不息其  
爲室必鉅且麗一旦弗能有梓人氏過而墟之卽能  
有矣而室主人或宦學四方羈跡遠域迴憶里閭輪  
奐之美僅夢寐見之由是以觀則宇內之闔廬皆傳

漳平縣志

卷九下

藝文下

二十

舍也寧第公廡之多閱人乎哉古明德達人雖一日  
必葺其室信宿逆旅必爲之汛掃以去來者咸知爲  
賢者宿處夫逆旅傳舍之尤者也而若人尤不以逆  
旅視之况其爲居與游之地哉夫必孜孜堂構之制  
以爲子孫謀其見則不達又必泄泄存傳舍之見不  
復爲來者計其心且不厚由不達致不厚其於學也  
必不能具斧藻之觀其與人共學也亦必不能泯畛  
畦之見此余伐檀書屋之建所由不能已也齋西舊  
有屋數楹圯且久余葺之爲室一爲軒二楹爲圃袤

數丈爲宇以達於序翼以迴闌植柳一蔣竹數竿晃  
朗蕭寥而游息藏修盡在是是亦可矣初余嘗薄遊  
吳會竊願結廬蔣山之麓又擬移家橋李事與心違  
今皆不可得計來此僅二稔懷抱鬱轡將引去之而  
猶事運甓以築斯屋非必爲來者計蓋所性如是而  
吾職所當爲者亦宜如是也旣而泚筆爲之記俾來  
者同此志焉嘉慶戊午十月旣望

重建文昌廟記

教諭 粘繼任

粵稽是廟建自前朝歷年旣久棟宇盡傾 聖像亦

漳平縣志

卷九下

藝文下

二十一

幾漫漶矣嘉慶二年季夏余鐸平庠謁廟瞻仰心殊  
惻然迺捐俸倡修四里紳士鳩金樂助擇廉且能者  
董理其事經始於四年四月越八月而工告成入廟  
展敬心竊喜曰廟之興廢有時而神之靈爽長在昔  
也垣頹瓦毀爐冷香殘神幾失所憑依今則殿廊峻  
整門闕崇閎視前尤輝煌鉅麗神所憑依將在是矣  
廟舊有祀田遭蝕今爲追復計年徵租穀四十八斗  
首士輪收以奉祀事並給香燈修葺等費照簿登記  
餘貲斂積增置祀租旣彰前美用垂後休斯廟甫成

科名踵起僉以爲神貺洵不誣也今嘉慶六年欽奉  
上諭京師地安門外舊有明成化間建文昌帝君廟  
宇久經傾圮碑記尚存特命敬謹重修現已落成規  
模聿煥朕虔申展謁行九叩禮敬思文昌帝君主  
持文運福國祐民崇正教闢邪說靈蹟最著海內崇  
奉與闕聖大帝相同允宜列入祀典用光文治着  
交禮部大常寺將每次春秋致祭之典及一切儀文  
仿照闕帝廟定制詳加妥議具奏欽此部臣覆奏  
敕下各省地方官循例敬謹致祭以爲常由此觀之廟

漳平縣志

卷九下

藝文下

二十二

宇之修事實相類而春秋祀典曠古特聞則安知平  
邑重修斯廟非帝君有靈默相速成以爲今日崇  
祀地耶詩曰神之格思不可度思入斯廟者當仰體  
聖天子右文崇祀至意鉅不屢邀靈貺而人文蔚起也  
哉爰爲記以勒諸石

一田一段址大菁深洋仔年徵租穀四十六斗  
一田一小段址本廟旁年徵租穀二斗  
嘉慶壬戌夏四月

重修高明寺記

王之楫 邑人

高明寺建自萬曆間爲邑治入龍之勝遙羅翠岫俯挹澄江巖谷蔚然深秀明憲曹三陳公嘗結廬讀書其下偕鄉先輩砥礪文章旋後先連步雲衢通籍後解組歸田仍棲居舊墅與諸搢紳先生時嘯咏江山流風餘韻一二父老猶有能道其事者蓋此寺鍾毓實薈萃一邑文人迄於今垂二百餘年矣雨洗風飄榱崩棟折而寺中菩薩梵王且駸駸多所剝落不獨騷人逸士滿目蕭然卽宰是邑者經邱弔古往往有昨是今非之感多以工費繁姑置之歲丙寅明府津

門蔣侯來莅此土簿書餘暇踪跡溪山登龍停之古刹稽豹隱之匡廬見日就蕪沒有不可以復延者遂慨然自任捐廉俸爲通邑倡邑中人因悉力悉心共勸盛舉於鼎新廟宇外廣修廨舍以嘉惠學人藏修凡經畫精詳規模宏達明府實獎課成之夫宣上德意勤政新民明府仁明久朗朗在人心目也而復成此雷音大覺寶像莊嚴俾多士肄業於斯共相摩厲日進高明得以希鄉大夫盛軌而明府圖光更照皦三乘矣

洪教諭東苑室捐田記

粘繼任

洪公楚產泉州舉人康熙間莅平庠鐸聲大振幾與  
晉江何九雲先生後先媲美何先生嘗建講堂於東  
山寺側課授諸生一時宗仰入名宦祠公慕其德亦  
構室於東山之麓捐置田租六十斗募僧住持祀佛  
地靜室閒邑人往往讀書其中足爲藏修之所與九  
雲先生沛然堂之建同此意也寺僧每逢公誕齋供  
曰篤不忘公之德不與斯室並傳耶余與二公皆泉  
人忝鐸茲庠景慕前哲慨然以興起斯文爲念凡諸  
漳平縣志

卷九下

藝文下

二十四

創造修復有關政治者無不襄贊賢宰董理協成雖  
未敢媲美前徽而於鄉先輩振興文教之風庶幾無  
愧焉爾嘉慶六年二月

重修漳平縣學記

訓導

林一聲

龍溪

嘉慶十七年冬聲來署平邑司訓下車展謁

文廟仰瞻殿廡楹柱多蠹蝕朽壞不支屋瓦簷牙弛  
剥櫺星門柱石傾圯泮池泥塞周圍就荒甚非所以  
妥至聖之靈也心爲惕然十八年春亟集紳士議  
修請於邑侯張公東銘司教盧君杰縣尉譚君經奎

同贊襄日偕諸董事下鄉勸輸醵白金九百餘兩以是歲孟夏興工邀諸生三十六人分日在視工役人咸矢公越二月秋闈期近奉檄晉省因部署諸役囑黃生昌期代綜其事勤慎如初試畢省回廟已煥然一新壯麗視昔有加遂於臈月之望告竣而

崇聖祠明倫堂名宦祠亦相繼就理期月而藏事於是諸生來請記竊惟立學之義歐曾諸記言之詳矣我

國家文教覃敷加意作人凡天下郡縣並設庠序以

漳平縣志

卷九下

藝文下

二十五

囿羣髦而於先師廟制備極尊崇豈徒用展馨香俎豆之心已哉亦欲多士覩宮墻而思美富意深遠也平邑夙稱文物之邦理學鄉賢代不乏人今廟貌維新高山是仰由庠序而益加懋勉升堂入室以上副

聖天子樂育至意則南豐曾氏所謂無斯須去於教歐陽子所稱士皆道德明秀可爲斯邑人士券也因書以鑱諸石其捐金姓氏及經理各費別書木板以爲來者勸



重修文昌橋記

知縣 盧 紳 南昌

城南龍江潭舊有浮橋一座編舟爲梁鋪以木板貫以鐵鏈爲往來之亨衢山川之鎖鑰也攷縣志創自明正德間宰是邑者徐君鳳岐迄

國朝康熙二十年查君繼純重造匾曰文昌計經興廢者九自是厥後志無可攷矣余於道光八年仲秋奉檄題補斯邑下車伊始覩城垣傾缺橋梁朽敗慨然有修復之意因值奉部停止工程修城之舉需費浩大不敢上請擇其工少而利溥者莫如此橋而清

漳平縣志

卷九下

藝文下

二十六

俸無多獨力難任爰集邑中諸君子告之曰是役也非以擾民實欲便民耳余勉捐薄俸爲之首倡尚藉遍告紳衿耆庶凡有好善樂施者務期踴躍輸助尅日鳩工共成盛舉如能絙以雙鏈圍以高欄則益鞏固完善矣查是橋原有歲修經費計共收穀四百六十餘斗除完糧祝 天后壽誕及橋夫工食外足資開鎖換船補板之用何以致於朽壞若此且上乎董事積欠纍纍非經理不善是誰之過矣計今橋成之後修費可省積數年有此餘備雖欲再整而更之亦

得有恃無恐所願僉舉公正殷實首事董司其事口  
經久不渝是余所厚望焉

新建靈峯書院記

林得震

嘉慶丁丑春余臺俸期滿咨補漳平學諭赴任以來  
常有靈峯社課送閱每月按期而至余嘉其舉業之  
勤因詢靈峯所在僉曰此和睦新橋地方離縣約有  
百里邑誌稱菁城八景一爲碧靈啟秀是也宋劉提  
舉陳處士明曾廓齋諸名人俱在是余心嚮往之恒  
以未一至其地爲憾旣而社之諸生盧生文藻等來

漳平縣志

卷九下

藝文下

二十七

謁因備言其鄉離縣遠隔每月課季課跋涉維艱爰  
招諸同人鳩集是課課起於乾隆丁未茲再議欲倡  
建書院余深嘉斯舉不但切於學業且大有關於教  
化亟勸勉以成厥事越明年諸生告余曰建造書院  
已定局矣院建在新橋前仰碧靈之秀俯臨清溪之  
曲上廳爲講堂次爲涼亭下分兩廊外有華表傍有  
附屋堂祀文昌帝君及朱衣神像名曰靈峯書院  
劉陳曾三先生故居皆在左右又議欲捐充膏火脩  
膳之資敦請名師主講定每月三課請余記之余惟

書院與學校相表裏學校所以教在庠者書院則教鄉子弟之秀者可使之遊於庠但郡州縣書院大抵皆仍其舊殊少新建者矧遐方僻壤富豪之家營室構堂不惜靡費卽僧樓佛寺不吝施金獨不聞建議講學之區非不欲子弟向學特不知學者敬業樂羣當在書院耳而此都人士遠隔縣城百里克成斯舉殆碧靈之秀氣重發其光抑余聞昔曾廓翁有心源精舍與諸生講究道學淵源有自竊願諸生講肄院中相期砥行立名遠溯鄉先輩劉陳曾正學之傳而

經綸黼黻必有各盡其設施者因歲試首舉盧生文藻優行率仝謁見沈學憲備述倡建書院始末學憲甚嘉獎之謂此事大有關於教化也不可以不記至於經始落成年月題捐經理姓氏屬盧生等自爲開列條晰以垂不朽

靈應記

知縣

蔡世鉞

五山

呂公國祐直隸三河人由學博晉宰斯邑惠心惠德既丕著乃兼攝龍溪篆卒龍溪官署而神於漳平爲城隍雍正己酉秋八月廿四日也陳君一山紀其事

道光庚寅春三月予修縣志錄入雜志述異中是時  
久不雨田未栽插市米騰貴予齋宿城隍廟五日默  
禱曰神果呂公忘漳平百姓耶明日戊午晦予偕斗  
東林學博蘭軒王少府步行率童叟至千人擁神至  
城南十里龍潭呼號請命神乍旋宮而雷電隨之雨  
止予又禱曰澤未沛也神其許我請以七日爲期乎  
越四月甲子昧爽一雨三晝夜農事畢舉米價始定  
士民歡悅夫昔之宰而神於事爲異今之神而靈於  
理爲常天下至異之事歸於至常之理惠心惠德之  
漳平縣志

卷九下

藝文下

二十九

及民無今昔一也雨不可不記以彰神之靈知縣事  
蔡世鉞敬鐫之於廟壁

龍濟巖記

嚴萬選

蓋聞水不在深有龍則靈龍之所以靈者以其能騰  
雲致雨濟大旱也平邑溪號九龍故潭多以龍稱城  
南十里有潭名龍濟明成化間余先人自桂林社移  
居蘆茨築巖石壁上聞有道者過之畫龍於棟而去  
霎時風雨變幻電光掣閃棟躍入水化龍其事近誕  
然捕魚者往往沒水見一渦廣丈餘深不可測曰龍

井井中有蜿蜒隨波欲作翻騰勢以所見證所聞是耶非耶潭隈有懸泉曰龍泉清清泠泠行人皆憩飲焉其上懸嵯巖削有如角者有如牙者有如鱗甲者老樹枯藤拏雲攫霧靈怪萬狀不可端倪登嵯俯瞰波隨風轉其皴鱗鱗然潭色一變卽有雨故潭曰龍濟巖名亦由此昉明嘉靖間曾廓齋偕同人遊憩於此鐫風轉瀾迴四大字於壁年久廟圯遺址榛莽然雩禱輒應蓋數百年於斯矣嘉慶戊午太學生嚴綿之率里人重建神廟己未徐侯汝瀾禱雨有應於巖

漳平縣志

卷九下

藝文下

三十

左搆數椽祀龍神像後有禱者無不驗今歲道光庚寅春三月大旱禱於神者踵相接未應戊午三月晦邑尊 蔡侯詣拜龍神旋署甘雨隨車越七日甲子連雨三晝夜農事畢舉民咸曰 侯之賜 侯則曰神之靈題尺澤立沛匾額以誌靈貺祀典凡有功德於民則祀之以神之變現靈迹利濟生民不僅一鄉之所仰闔邑皆沐其澤也請登之邑乘明其宜崇祀勿替云爾

摩雲巖記

廩生 邱 輔 龍 巖

藍田之墟南行三四里有巖頭林從西山望之層巒  
疊巘高出雲霄且樹木陰翳實爲福里之勝地予就  
館新坊課率生徒兼以闡期漸近未嘗一至其地日  
者溽暑侵人講誦之暇偶與陳君吉如李君茂華披  
襟選勝相與遊覽其間見其枕高寨俯晴川千崖環  
翠萬壑爭流迨憩息久之清風遠響列植交陰雲烟  
杳靄若置我於圖畫中也余方舉步欲還二君告曰  
遊如是已乎山之北巋然更上一層有古洞焉不可  
不乘興而往於是躡衣而上攀援而登凌險巖履巉

巖有二洞翼然臨於其上 一則透剔空嵌峻峭而狹  
一則幽邃滄滄中可坐三四十人其怪石角列偃蹇  
或跪或列或立或仆爭爲竒狀者不可勝數穴竅細  
水涓滴聽之錚然有聲或曰此小石鐘也或曰佛臍  
瀆水可以療病也顧蛇虺之所蟠狸鼠之所伏惡木  
毒卉亂雜而爭植荒蕪穢墟遊者罕到乃遂命工匠  
斫榛莽焚茅茷且建亭巖左以爲遊觀則山之高石  
之竒遠水之潏洄杉松古木之幽蔭舉迴巧獻技於  
巖亭之下里人欲鐫石以垂久遠余名巖曰摩雲亭

曰拱翠二君又來以記屬余余謂物之成毀有數而名勝要必待人而傳以斯巖之竒特致之江淮灃鄆則銀瓶玉盞之翠列螺峯石鼓之嵐光與夫千崖萬壑縈青而繚白安知非山陰道上之形勝也平隄遠岸迴環屈曲其清瑩秀徹可以備詩人感懷寫離騷之極目安知非鈇鉤潭西之小邱也嘉時令節遊人士女行歌而互答安知非瑯琊之蔚然而深秀也得其人以居之雖峴山之碑西蜀之亭與羊祜子雲之名而並著然則碑與亭有時而磨滅而其流風餘韻漳平縣志

卷九下

藝文下

三十二

碑

儒學沈公去思碑

王以通

龍巖

聖明御寓所以治教休明風移俗易者匪獨其有司良也維挽幹旋藉有賢師儒在焉顧得民深政遜於教操術難教倍於政此提衡人物者徵去思而宦績

較然覩已平學肇開於布衣陳先生俎豆是鄉嗣是海嶠文人至者率由斯軌第記斯堂者則有若恕齋周公之方正修埜蔡公之介直草亭鄧少壺黃二公之忠厚蓋均之以深自効而不以難自阻者宜乎其法滋久而思滋深也寰寓沈先生鼎姑蘓人諭平三載以遷蜀授行士懷之請記於余余廉其狀雅意媵修一以興賢育才爲務待諸生如家人父子故其法言正論可欽其赤心白意可掬其多方搏掄曲成靡遺也可慕不可諉洵方正而嘯之以潤澤介直而濟

之以雍容忠厚而出之以博雅也乎平人士崇學迄今有布衣風固賴諸君子之陶埴先生亦可謂能濬其脉而衍其流者矣后人之輿而誦之尸而祝之也悠乎其未有涯也歟哉至若篆而勵懸魚與司政而標翔鳳是又就深測淺因難知易耳然貳先生者有歸化夏君冲姿粹行嚶鳴蘭契於同堂則先生之教益普美益章也其果斯文之幸耶抑亦多士之幸也余抱朴素與古君子遊次第類紀俾仰斯碑者先生垂不朽且識並時之有二賢云



鍾侯去思碑

連繼芳  
龍巖

戊申十一月郡侯鍾君來篆平邑及代去復之郡邑父老僉謀爲勒石計走而丐言於余余謂之曰鍾侯之仁愛其在於漳也爾邑之所同被也爾邑被鍾侯之政卽往之郡焉而嘉惠後來方將未已且鍾侯向未一日榮擢去郡一日榮擢去而感之者有愴然□之者有同然則又安以私之於爾邑也諸父老相與泣曰往者昊天不弔降禍余邑民遭塗炭之苦者垂五六年巨胥惡皂侮弄縉紳不俟聞命自以納人於

漳平縣志

卷九下

藝文下

三十四

囹圄中一夫犯罪舉族爲殃賣兒貼婦於無寧歲其挈家而散之四方者幾數千人先生獨不聞之乎及鍾侯篆吾邑釐其巨奸剔其夙蠹而所爲散之四方者遂以稍稍復聚則鍾侯之惠於吾邑大也且鍾侯晨出而理日昃而退是非曲直俱惟明允明慎如山不留若火囹圄坐虛牯拳立解義不取吾邑一錢也則其遺愛孰有大於此者乎故侯雖同爲惠於郡之民也而吾邑之被侯之惠者則又獨也塗炭之後施以覃恩吾儕之獲高枕而聚室家者是誰之賜也是

又安得而不思思而安得不勒之石也余惟吾漳僻在海隅漳平阻山帶水其人椎魯朴野貧而無資多業爲農深山之民至有白首不識縣官威儀者蚩蚩之民一或株累逮之公庭舞文吏夤緣爲奸語以某罪某罪則有頭撞地身被酷刑卽欲出一語自救焉不能也故爲上者不患其無以安之而患其有以擾之不患其法之不立而患其法之立焉而奉而行之者之爲虐也今侯之爲政也其在郡也無以異於其在邑也然而其在邑也而民不知其爲侯也出而詠

焉入而安焉困者獲蘓訟者獲息譬之雷雨交作元氣鼓盪百物甲坼則又何啻倒懸之解矣昔漢庭二千石毋慮數百十人其所稱循吏獨以龔遂數君子然觀遂之爲渤海也亦無他異政唯止罷逐捕盜賊吏民以畜積訟獄止息而已今侯之於平也而能使困者蘓訟者息則又何異於遂之爲渤海者乎故曰不患其無以安之而患其有以擾之不患其法之不立而患其法之立焉而奉而行之者之爲虐也爲政者誠立之法焉而又無以擾也是則爲政之大者也

侯名顯別號步雲爲贛之定南人

王侯去思碑

陳嘉議

天下有強之而不能抑之而必伸者此直道之公而人心之良也直道之公人心之良根之而不可解發之而不自知是以謂之不可強不可抑也卽有爲所強爲所抑而勉於一時終非其好矣又况以去畱之際新故之間彼此易念趨舍異情而苟非其嘿結於心惠孚於志而欲使其戀戀不忘藹然若慈母之依也是亦不可必得之數矣且夫令之於官猶傳舍也

漳平縣志

卷九下

藝文下

三十六

令而謂之攝民又將以傳舍視之也攝令者曰吾自有其職耳於彼代庖則其職多不稱謂攝令者曰吾自有吾令耳於此暫治則其情多不孚是以爲令之難而爲攝令者之尤難也攝令者而能得乎民情其情有倍於爲令者矣乃王公之攝篆吾平也踰二月而始一年匪有三年考績之久也而民之思之何以若是之深也其君子曰王公溫而和恭而有禮坦而不迫於衷斯其爲士大夫之望哉其小人曰王公廉以直簡而不苟儉而無求於人清靜而不擾於衆此

其父母孔邇而吾儕小人之所懷哉是以耕者相與思於野賈者相與思於市老者幼者相與思於家其在也不知有追呼之擾其去也不勝其慕戀之思是皆所謂根之而不可解發之而不自知不可強不可抑而非勉於一時者之所能爲也不然縣令之威權雖能行於一時而久之民且有斲心甚者鷹鷂視之去之唯恐其不早而又柰何以言思柰何以未及一年署篆之令思也王公恂恂儒者已不實名利於胸中雖每事包容而實外寬而內明其器宇度量固不

可涯涘測也昔黃霸之爲潁川多有惠政後遂以治行第一徵入爲御史大夫位至丞相今王公之治行固不作第二人亦行將徵入京師如五鳳中故事則其被澤又豈特吾平也哉吾平一邑之思又蓋其私也王公名廷對別號抒素爲撫之金谿人金谿之先有黃蒼嶽者治吾邑亦著廉能民亦至今稱之因知江右固多君子哉

董侯去思碑

陳六韜

邑侯臨海介繁董公以甲申春仲自巖邑來署吾平

出民於湯火中勞來還定問其疾苦芟其蝨螟突不  
黔者相與返於室裏不入者相與遊於邑浸假而雞  
犬安浸假而婦子嬉浸假而商賈集於市行旅出於  
塗雖當寇焚之餘猶欣欣相告曰天之惠我以仁侯  
也君子學道則愛人小人學道則易使捷若桴鼓烏  
在爲久道化成哉將及期得代歸巖巖視吾平不百  
里而近父老子弟猶在仁侯襁抱中爾乃若有不能  
須臾舍去者相率徵言以勒不朽余惟君子歌風詠  
俗莫備於詩詩咏嵩高蒸民羔羊諸什大都讚述其

大夫約己惠民恭上勤民之績而最切莫如民之父  
母之一言父母於子雖甚弗類亦百計求所以生之  
未聞百計求所以殺之也王者之道利之庸乃始  
殺之而不怨嗟夫蚩蚩者之沒於利也久矣但知出  
爾者之爲非而不知反爾之亦罪但知悖入者之爲  
過而不知悖出之亦愆也非我仁侯至止委摯周全  
呵護而噢咻之平其復有完民讒人高張役夫孔多  
旣罟且數繼以竭澤一以爲赤子一以爲龍蛇何生  
之與有侯自仁心爲質余所云百計求所以生之者

如此如此然後可以爲民父母也亦詎曰倒懸之後  
易爲德今國家多難西北瘡痍未起東南杼軸其空  
安得當事盡如吾侯以至仁易至不仁耶雖然平之  
爲邑風土礪深民俗朴魯見捕役則心惕息見豪胥  
則頭搶地而頃日之患又有加於此者撫劍疾視之  
雄武斷鄉曲一揮百從攫金於市割種於田暫若尋  
常所過爲墟矣害民之生毒於兵火侯廉厥渠魁詢  
之國人皆曰可亟寘重典而通國咸服蓋公之爲平  
盡善政也而其大指稱是矣昔于公治獄不阿不枉

漳平縣志

卷九下

藝文下

三十九

曰吾後世必有興乎侯先世嘗有司李吾漳者口碑  
尚在方將報祀學宮世德作求侯當翼贊天家遠媿  
申甫仲山之烈又豈獨平民之歌樂只

沈夫子去思碑

陳乙駿 邑人

沈夫子去思碑者思沈夫子之去也去而思之恆情  
乎曰是不然古有巡方去而爲南民思矣歌棠類是  
也外此則口出縉紳諛爾州刺去而爲相士思矣君  
八輩是也下此則載自史氏文爾則不惟其去而思  
思而碑亦問其人之不可去其人去之可思思其人

而不忍去不得已傳之石者其將有如吾師沈夫子  
否也夫子諱穆字旦及古越名家聲稱藉甚予平多  
人士高山積仰丁亥秋師適來開臬振鐸側弁而哦  
事事步趨聖賢爲真儒提榜樣四方聞而至以北面  
宗者屢獵獵滿戶內聆厥命誨皆不必接紙索義執  
圖求形凡袒跣談笑援引風論能令人點頭會心如  
天龍一指廣洋隻筏也耿介自持骨鯁嚴峻同城咸  
憚之無敢忤民士賴以卽安論者謂其去家千里辣  
手援人寄跡一官鐵肩撐道維師亦云吾在菁城是

鑠石流金中一帖清涼散也若欲易而春和景明則  
力不逮矣而飄飄遠遊問伊誰舉案若箇牽衣樵青  
未錫雲腴自煑意洒落自如是則其持己也類海忠  
介其教人也類胡安定洵千百年僅見也哉諸上臺  
勤嘉美時用薦聞而師獨白雲睹綵遂有大珠易餅  
放舟三泖意是歲春暮由霞來與吾黨別焉城郭已  
非風光殊故相對而詢不覺涕下乃師以去告矣諸  
弟子聞賦捲堂緊步芒鞋百里犇呼爲截鐙謀師輒  
□堅辭去嗟乎曾不憶依依兩載間師視吾黨猶子

吾黨亦事師猶父而師忍其去也夫世有子靜人思  
鵞湖世有翼之人思湖蘓去者不可畱而思者未嘗  
去則謂師而去哉師又何嘗去哉去而不去則此思  
之勤於碑者吾黨士千百年猶與師處也視彼縉紳  
誌諛史氏文飾者不甚相遠耶謹搦管而礪於石時  
通庠門人陳宣柱葉繼祖鄭爾發陳乙駿李象榮陳  
樞鄧天澤嚴震楊魯變陳贄李暹蔣振芳等共誌云

查侯德政碑

奉化知縣 鄭 懋 龍巖

邑侯查父母浙之海寧人也起家文學便以天下爲

漳平縣志

卷九下

藝文下

四十一

己任弱冠登副車由是入尚雍謁銓選得擢漳平令  
夫吏治蓋綦難矣爲令難爲平令尤難爲平令於凋  
瘵之後則愈難平巖邑也僻處隩隅山多田少地磽  
民貧則經理難海隅效順矣而不逞之徒鴟音未革  
鷹眼猶存或朋比樗蒲巧設攫金之穽或詭捏詞訟  
大開網利之門諸如此類難以枚舉則鋤強扶弱難  
是數者皆人之所謂難也然而自侯處之舉無難也  
甫下車卽軫念民瘼虚心實意貫注於綏字間所以  
治公之暇延攬紳衿讀法之餘咨詢父老譬如漁樵



之於山水習見者自明又如川陸之於車航適用者  
爲益所以知之眞而行之力不數月而利興弊剔教  
化大行團其宜也革火耗剔陋規免硃價定編審所  
以經理之也四知自凜兩造無冤勾攝省而雞犬不  
驚犴狴清而烏雀可羅所以撫字之也捐修 文廟  
以崇聖葺理橋梁以利民課諸士則耳提面命文教  
煥然一新講鄉約則家至戶曉風俗頓爾改易所以  
整飭之也至於軍需孔亟侯則度其可行者婉曲慰  
藉勸民輸將其不可者不憚爲民請命卒之民樂於

急公卒得當以報上命所以催科者固如此若夫飭  
除賭博嚴禁私宰土蠹勢豪包攬詞訟捏影射人不  
難立置之重法於是奸人屏息比戶可封所以鋤強  
扶弱者又如此是數者皆人之所謂難者而侯處之  
舉無難噫平之民何多幸哉宜乎謳之頌之尸之祝  
之且欲勒之貞珉以垂不朽也予忝屬隣封平與巖  
讓相接趾相錯語云河潤百里海潤千里予固有所  
重藉也豈獨爲平民幸哉故不禁欣忭而樂爲之記  
啟

纂脩縣志成上查邑侯啟

蔣振芳 邑人

伏以治設九龍光藉爲龍於澗水城周百雉聲蜚馴  
雉於閩疆出鳴琴坐理之材爲脩乘廣蒐之舉粵成  
化至嘉靖戊申七十有七載曾朱始輯於前由故明  
迄

皇清癸亥二百十三年紳韋莫爲之後茲者祇承丙  
命特切寅衷恭惟老父師大人台臺儒宗越海仙令  
臨漳秀孕紫微山應十五點郎星光騰紫極香薰菁  
社地分六一泉波澤潤及菁莪百廢具興奏治功更

漳平縣志

卷九下

藝文下

四十三

傳治譜寸長必錄開史局應藉史材按此平疆分於  
巖邑墉垣之言仡斗絕一城疆域之延袤星羅四里  
爲和睦爲感化襟枕延泉曰永福曰居仁藩屏霞郡  
山川形勝雄蟠漳水上流文教淵源遙沐布衣遺澤  
版圖錢穀民力普存禮樂兵刑官方攸繫去思成畏  
壘雷封轟名宦之聲立品砥頽波月旦表鄉賢之蹟  
且人材三途並進卽士女一節必揚漳南賦虎馳名  
嗣起藝文可數明季騮精傳恠歷來災異必書當戊  
子兵弄潢池迨甲寅戎興藩服城經三破民歷百憂

歲役二十四圖鳩其形而鵠其面地征七百餘頃草成宅而石成田催科倍急於曩時輸輓代勞於它郡自非噢咻撫字集化離重困之哀鴻孰克蒐撫脩明作鼓吹太平之景象遙成曠典爰備鉅觀如振芳新日喆象榮碩者質媿苾蔣賦窘長楊委置道傍徒愧果成多李襲藏山穴詎能紙滿千張幸托栽培聊佐籠中藥物慚叨賞識不遺爨下桐音用搜殘編斷簡之餘以補野史稗官之闕伏冀鑑垂如月斤削成風祈點鐵以爲金俾得續貂於舊典望添花而組錦允

漳平縣志

卷九下

藝文下

四十四

堪儀羽於後賢行見位列鼎台而天柱銀瓶篋盆石鼓永畱宓瑟清音從茲班聯鵠序而龍門螺井鶴瀑象湖常著葉鳧芳蹟矣謹啟康熙癸亥季春穀旦  
引

募修文昌橋小引

知縣

楊于蕃

陽山

城南之文昌橋所以利涉也初術者謂山川至此不向而背不畜而洩聯舟設橋以聚其勢邑之文風財賦與有賴焉其所繫又綦重矣自辛酉重修及今五載爲日已久風雨摧侵材木壞爛而浮者亦沉其如

始制之意何余忝茲邑長所宜引爲己責但素守清  
苦獨力難支惟捐俸以倡尚須衆力協成之謹布數  
言以告邑中紳士耆庶凡有好義之心者期努力捐  
貲毋故少而靡多毋有名而鮮實毋艱於出納以需  
月日將見衆擎易舉聿觀厥成其有裨於斯邑者豈  
僅利涉一事云

文

釋奠先師文

陳眞晟

竊惟夫子之道一本而萬殊夫子之貌一實而萬分

漳平縣志

卷九下

藝文下

四十五

所謂際天所覆極地所載凡有血氣者莫不尊親豈  
不宜哉今漳平又添一貌矣雖然溫而厲威而不猛  
恭而安惟夫子中和眞像而涵養進德修業尤尊夫  
子聖學之正教旣得其像尤尊其道則夫子在天之  
靈其少慰乎哉幸此深山士子慾心未動良心未喪  
未有功名利祿搖動其心未有記誦詞章破壞其體  
大可教也願在天之靈陰誘默相俾大有成他日出  
學而仕世皆顏生玉佐之才足以成伊周事業則天  
下之學校皆正教之學校也其皆有賴於王靈乎嗚

呼至禱也惟茲縣治新建聖像既成禮宜釋奠

詩

朝天嶺

本府同知龍遂

咫尺星辰似可捫蒼藤古木自朝昏飛泉噴壑蛟龍  
怒危石霾雲虎豹蹲峭壁青天稀去鳥清秋白晝聽  
啼猿山中老叟來相迓指點荒原幾處村

陳石洲陳文溪同登尊生樓翫月卽事

樓在桂壩尾

蔣銓郎所築歸休地

蔣時馨

海上桃花處乾坤護一邱人家蔭綠樹樓閣倚滄洲

漳平縣志

卷九下 藝文下

四十六

日暮火雲散天清象緯浮露浥桐陰靜星涵桂影流  
賓朋歡至止譚笑盡良謀洛社欽名德高陽亦好脩  
盤供鱸膾薄席引象樽幽不言愛桃李取適狎鳧鷗  
濁酒憂將罄清歌樂未休夜闌撫衾枕月色入簾鈎  
起視峯巒頂頓豁古今眸景比玉壺淨人疑兜率遊  
有氣凌霄漢無槎泛斗牛啣杯相慰藉天地一浮漚  
登蔣蘭居尊生樓翫月賦謝 陳九敘  
生平野性耽山水到處尋幽不便休老去門闕誰作  
侶興來夜半我登樓月憐騷客宵爲晝雨洗爰天夏

作秋可是主翁能好客不妨杖履續前遊

上許敬庵開府

陳九敘

聖學肇唐虞三王莫或殊衰周一堙塞孔氏闢其蕪  
日月揭重光乃還天地初源源一脈線濂洛奕來茲  
清朝先覺民昭哉開坦途翻然奕世後流風漸爾微  
七閩道南鄉倡率嚮來稀邈矣聶惠文多士首皈依  
開府我許公闢地相映輝公暇羅冠紳談道不知疲  
色笑宏伊教青衿如雲歸師表李羅翁偶來共絳帷  
析理入幾微導誘復孜孜昌言激豪英多方迪後知

漳平縣志

卷九下

藝文下

四十七

心性引端倪問學功靡遺誰謂顓蒙資聽者甘如飴  
誰謂造化堙含生同秉彝一陽葭琯動萬有兆生機  
春風轉披拂灼灼桃李枝願公久道成我咏旱麓詩

遊小都鳳巖

在城南二十里即西湖巖

陳九敘

未離塵寰暑氣侵偶來巖壑稱予心天開勝地如相  
待人入名山不厭深白粥清泉輕列鼎樹蟬草蟀巧  
鳴琴此生到處須尋樂莫問祇園與竹林  
市喧元不異山林泰宇何能溽暑侵只爲世情橫緹  
縛卻□晴朗變沈陰吾儕自有華胥樂天下豈無堯

舜心欲說說來誰信得聊因餘興托長吟

次陳文溪偕曾五溪遊龍亭寺 葉時新

周旋時事自知閑不落風塵主宰間每泛孤舟觀碧水也憑佳節歷名山吾鄉幸有眞朋聚世道應看淑氣還記得當年山寺講乾坤清氣滿林闕

咏玉簪山

蘓潛龍

蒼松翠薜幾千年峭壁危峯插耳邊滴水涓涓穿石罅迷嵐靄靄雜茶烟閒來欹枕羲皇侶興到扶筇葛氏天洞裡不知塵世事遨遊直欲挾飛仙

漳平縣志

卷九下

藝文下

四十八

清明雅集東山塔

陳六韜

欲與同人好作緣登臨半雨半晴天陶歸不爲初荒徑介隱何須久禁烟千眼摩空看漏網百鱗赴壑聽談禪爭能化日分閭井勿使春風我輩專

松關聽雨

陳六韜

聽雨窓櫺坐悄然溪流漆瀑更潺湲空濛當戶雲間月宛轉穿簾几上煙百尺簷花和白雪三春客夢倚朱絃陰晴莫問明朝事人在松蘿已二年

春日題獨樂軒壁

陳六韜

一闥收春門洞開春風如意坐徘徊泉聲漸向閒中  
入山色漸從雲外來獨樂軒題君實句揮毫人是子  
虛才主君原有芝田種瑤草琪花次第培

竹齋晚涼因懷季玉得長字  
陳六韜

新綠齋頭日正長橫襟坐納晚風涼蜘蛛謬巧巢荒  
牖薜荔從橫渡短牆一望雲山多別意半庭花卉是  
愁腸惠連不作園林夢好句何緣到枕囊

山中送季玉歸讀蘓樓  
陳六韜

我亦萍踪未可謀送君歸去讀蘓樓從來同病誰青

漳平縣志  
卷九下 藝文下 四十九

眼何處相思不白頭人對薔薇殊地月花畱芍藥一  
春愁社鶻漸苦鶯聲老各向雲山憶舊遊

清明前一日獨坐叢桂山居  
陳六韜

苔徑柴門獨坐時殘紅落遍杜鶻枝短長夜夢三春  
雨新舊啼痕一首詩遠水添流寒自咽輕煙戀几去  
還遲詰朝應負尋青約何處相關不數竒  
空齋宿雨帶花明一縷清煙萬縷情午夢初醒如病  
酒春愁不斷又聞鶯疎窓草色窺人入遶逕蛛絲拂  
意生自是年來宜寂寞傷心莫賦重行行



古梅行

陳六韜

小樓三尋牆十尺石上蒼虬飛不得蜿蜒突兀意未  
降化作老梅年八百蛾睂山半夢初醒恍惚自疑天  
上謫拙心知不競朝華古色儘堪畱夜白有時寫入  
鼎彝中有時醉偃琴書側君不見前年雪花大於手  
千紅萬綠無消息一松一竹與追歡令人千古夸三  
益又不見去年風雨自西來頽牆破屋如翻席老榦  
枯株若不聞詰朝忽變玻璃色吁嗟老梅人不識鼎  
鬲調羹終有日小樓五月逼江城畱傍闌干莫吹笛

漳平縣志

卷九下

藝文下

五十

君不見老梅梢上長新枝占斷春風桃李時

和木政靖訂社之作

陳六韜

誰能更問柱中流覓得桃源買一邱醅裏葡萄春發  
釀花邊蝴蝶夢爲周麗人分韻酬還倡佳客當筵去  
復畱如此不嗟生計拙何妨結社作豪遊

重九後一日送家仲歸長榮

時長兒應試北上

陳六韜

白雪青蓑事幾何鷓鴣棲鴈序喜相過歸來杖屨知音  
少夢入園林得句多初見新香來月桂尚餘勁綠在

霜荷大家老健能杯酒長向尊前聽艷歌

青城次陶祖江年兄韻奉酬來教

陳六韜

一官拓落若爲同人在風波十載中敢謂衛公偏好  
鶴翻慙老子不猶龍山城爲爾開春釀客夢從他到  
曉鐘却歎詩人空恤緯祇將杼軸賦雙東

小塘行

陳六韜

五月鄉村農事急一望平原千里赤小塘瀦水不盈  
尺細鱗萬口吞聲泣去冬一雨泉無脈膏霖春晚無

漳平縣志

卷九下

藝文下

五十一

消息老農仰屋它無策只說如今竟不得明朝有事  
宵馳檄桔槔龍骨紛如織前車未已後車逼取之勢  
不畱涓滴自憐聚族居汗澤相濡以沫相煦濕祝融  
爲政炎蒸極從此應知無起色吁嗟相視如秦瘠蠓  
蟻鮎鰕安足惜所願沛然施帝力爲霖作雨連阡陌  
不則上農求遠晝漏穿蟻穴頻頻塞勿使畦枯峻亦  
枯空歌雲漢嗟何益

遊五老洞

蔣位

地僻雲應占僊居境更幽山椒逕曲轉陂坳屋平浮

烏匿天低礙青鞵草密收柳癭斟石乳一嘯滿滄洲  
已到上方境黃雲濕不飛谷空人語應苔暗屨痕稀  
坐處縈山髮行時見水衣童童虬蓋密湘簟卧忘歸  
何舅悌邀諸友遊東山寺限韻賦詩

陳嘉議

渺渺山城一抹烟始知此處逼諸天雲霞齊擁孤僧  
出日月雙擎石塔懸突放毫光開寶地時聞法鼓奉  
金仙羣公逸興原非淺斗酒吟成詩百篇  
深山古木帶寒烟可是其中別有天長者金錢多布  
漳平縣志

卷九下

藝文下

五十二

泗洲亭

何九雲

過蓮花巖嶺頭舊有泗洲佛土龕長溪在下  
俯邑城櫟林兩岸烟井予往來東山最愛其  
勝爲結亭焉泗洲僧迦大聖或問師何國  
人曰何國人  
泗洲大聖本來真何姓姓何自在身若問山亭誰結  
構依然居士姓何人

平先輩詩

何九雲

應志華陽習傳耆舊平雖甌脫亦有前修設  
帳於茲有問以人物者愕不能對是亦論世  
之恥也稽之往牒詢諸故老得劉提舉以下  
數公著之於詩

劉提舉 棠

提學起窮陬翡翠鳴禽族既領開封解還司浙江穀  
板輿一何榮銜恩聽繡服廬陵昔咨賞紫陽亦見錄  
名論嗟不傳當時照場屋

陳處士 備

漳平縣志

卷九下 藝文下

五十三

在宋元祐中羣才咸奮作處土工詞賦文林擅余獲  
邈哉溪南烟谷口同寂寞

陳員外 雍

以諳書數清理錢帛於內府適遇  
宣廟親察之嘉其精口遂欽除焉

書數雖小道古禮興三物員外通九流成均昔鼓篋  
內府鉤泉賄精勤帝心悅度支遂含香青兗仍驅節  
兒曹困無資清風扇門闥

曾運使 汝檀

□運耽尚友釋褐慕江門出麾三典郡諸生惠討論

厥非嘉種何繇好與堅獨於絕學中微究伊洛源  
堂今雖蕪祭菜尚未寒

陳天台 茂芝

有濕直縣中例錢也悉却不受歸三十年寄

入台稟介獨手揮濕直資到官僅八月悽惻救癘疲  
拂衣三十載父老歛門扉番番應尚書千里緘苦詞  
外迫倒懸困中表去後思

陳崇義 應元

一之官徧奏利病於監司曰治一邑祇善  
邑非可謂能慨然有善四方之志

漳平縣志

卷九下 藝文下

五十四

陳公需選人簿領羞齷齪慷慨天官前轉授攝都牧  
利病靡不聞意在四方活歸來老且貧藜羹不飽腹  
固窮永自甘杳然似干木

陳太守 九敘

處州本真淳韞樸猶未傷所乏希世務陸沉返田桑  
束髮服師訓終身眷廓堂偃息東林下抱道日徜徉  
媿彼車上儻華軒竟茫茫

蔣吏部 時馨

吏部昔爲縣每書陽城考及乎來陪京含英推國寶

矯矯歷銓司孫標門可掃澄敘招衆咻家貧廩嘗倒  
有弟守蓬蒿何必減次道

陳孝子 思齊

臯魚擁鏹泣千載尚心哀皇皇陳孝子終廬土一抔  
麋鹿走我側烏鳥鳴其隈歲時慙返舍羣從卹然來  
遺風猶在口令人痛南陔

葉貢士 時新

年四十盡焚少年雜著講求身心之學應曰  
不仕仁讓有聞里人化之生徒入祠私謚曰  
先泰陽生

漳平縣志

卷九下 藝文下

五十五

葉君鄉祭酒諸生半在門師道久不立馬鄭章句繁  
君乎討性學言行必有藩庫里非一社獄訟消囂昏  
私謚擬貞曜足使清議存

菁城八景

知縣 查繼純 海寧

蒼尖列鼎

竒峯接雲漢鼎列似三公古木餘森秀蒼苔正鬱葱  
登臨雉堞小環拱海隅雄更有文明色鬢宮日照中

龍江虹渡

城下溪流猛民多病涉時驚濤憑鎖鑰巨壑起龍螭

水勢初迴合山形漸委蛇莫言川澤險利濟與心期  
高明週眺

天塹龍盤勢巍巍氣象雄千巖懸曉日萬木挂清風  
俯瞰滄洲遠憑虛霄漢通乾坤真浩蕩登眺意何窮

碧潭澄鑑

碧水若環帶潏洄此獨清沙明星倒影泉湧水無聲  
鼓棹魚龍躍翻雲鷗鳥驚相傳靈異處霖雨濟蒼生

石鼓迎仙

攀躡層巒上竒峯自不羣人尋仙跡香風雜雨聲聞

漳平縣志

卷九下

藝文下

五十六

瑞氣尋瑤草晴光散彩雲名賢多識賞吟詠見清芬

碧靈啟秀

靈巖何聳峙一望與天齊黛色連崖翠松陰向日低  
名山鍾瑞寶紫氣奪雲霓千載高風在真儒先後題

鶴湖三瀑

懸泉如匹練衆壑共趨奔嶺峻煙霞鎖林深鶴鷺喧  
平湖分瀲灩飛瀑聽潺湲遙指空濛裏雲根並水源

龍津三清

海外鯨波息安瀾在此間津深須問渡徑曲任高攀

湛湛涵銀漢盈盈照玉山高垂千里澗靜坐正餘閑  
呈查侯  
蔣振芳

南劍西來第一峯逶迤北蹕駐溪東九龍霧湧碧潭  
下百雉城開菁社中襟帶延泉形勝仡藩屏漳郡會  
圖雄龍門洞敞涵氤氣螺井雲高湛碧空二十四圖  
生齒錯七千餘畝土田豐舍興運使心源合祠祀布  
衣道脈崇從此百年眠帖席經今廿載亂如蓬探九  
處處長蛇窟布壘山山猛虎叢不有長材來展驥可  
能安宅集哀鴻冰壺映徹五溪月玉軫清揮四里風

漳平縣志

卷九下

藝文下

五十七

雨禱三湖飛白鶴澤瀾兩岸渡華虹蓮花巖上鐘聲  
靜櫂子洲邊笛響窮壩尾壩頭呈稼綠城南城北種  
桃紅麥秋四月歡初熟椿樹千秋喜正同桂社榼將  
芹並筍雲街嵩祝釋和翁洞中五老羞雲母峯上九  
僊還玉童寶蓋凌雲迎佛子銀瓶承露覓壺公仙鳧  
歲歲應長在奏罷雲璈曲未終

詠菁城八景呈查侯

楊新日  
邑人

巍然不與亂峯羣絕頂斜封一片雲明府自饒調燮  
手坐看列鼎應台文

蒼尖列鼎



亂流橫渡駕長虹利涉誰居利濟功從此龍江歌且  
舞依稀人在六橋中

龍江虹渡

西來身現梵王宮百里江山一望中喜見春光周蔀  
屋萬家煙樹夾花紅

高明過眺

水碧於藍一鑑明騰騰雲霧起龍精時爲旱歲敷霖  
雨四野枯苗盡向榮

碧潭澄鑑

風雨微聞石鼓聲人踪物跡類初平畱將此地邀仙  
鳥瑤草瑤花夾路迎

石鼓迎仙

崔巍特秀萃三靈空曠無垠際八溟高擬華嵩齊日

漳平縣志

卷九下 藝文下

五十八

月文光先得煥郎星

碧靈啟秀

白雲載鶴去悠悠祇見飛泉作瀑流自是郎官清似  
水山中五月凜生秋

鶴湖三瀑

三清疊瀑下龍津潤入桑麻滿縣春盡說在田多德  
澤祇今先及此方民

龍江三清

陳二漳殉節遺詩

一公自焚堡內於垣外得素衾  
一幅題詩三首

四載泣孤臣空辜夕與晨居旁無止水盼斷石嶙峋  
莫後夷齊死前慚忠顯身衡陽山未圯樂與祝融親  
瘞骨非吾子銘心及汝曹九霄懸日月一死等鴻毛

二漳先生蓋有宋劉忠顯公後身也臨難詩其明  
微矣所可異者當日引決堡內則見白光一道冲  
霄直上萃於雲端是晚四山燈光燁然無慮千數  
近之則不見遠之則有望又有翩翩鷺翻三十加  
三集於先塋序列左右竟日不差鄉人疑爲白金  
胥往偵之倏然飛赴殉難堡中環繞垣上若宋護  
者次日弋人致纂將設機向之忽蹣跚哀鳴聲極  
悲切聞者竦然而止抵暮方向西騰去先是公得  
雋日豎旗祠前白鷺繞旋半餉而後北去今靈異

漳平縣志

卷九下

藝文下

五十九

或者於斯再見乎

劉幹謚忠顯宋欽宗時殉節

訪陳一山不值題詩尋樂處

雷

鉉

寧化

奉

命展師墓兼因訪友來不辭由道險得過此城隈極目

山川秀遙知文物開蒹葭秋水思欲去轉低徊

小都巖步陳文溪先生韻

陳

廣

邑人

習靜烟岑避俗侵山花相對兩無心雲扶翠竹千尋  
聳月湛清潭百丈深杉塢風吹無孔笛松濤雨送有  
絃琴宗之唾咳成珠玉緣結空青倚石林

葉元甲 邑人

獨上西湖俗不侵  
筆花簇露沁文心  
晴開圖畫天非小  
洞隱雲霞境愈深  
埜鳥有情空晚磬  
山蟬無語曳殘琴  
題詩人去詩猶在  
韻滿喬松月滿林

第一峯遠眺

朱泗 邑人

我欲凌泰岱俯視天下小  
不插雙飛翅風塵困擾擾  
蒼巖有名勝菁邑雅不少  
偉哉第一峯峭拔東南表  
躡屐造其巔身輕如過鳥  
坐定豁雨眸高低半昏曉  
積翠遍雲烟煙空雲散了  
蒼蒼暗絕谷百道飛泉繞

漳平縣志

卷九下

藝文下

六十

滙爲清水湖湖水浩淼淼  
九仙倒影入高巖一目眇  
石鼓指可數西霧歸縹渺  
腳跨黛烟山山容盡窈窕  
窮高得勝遊結伴乏朋僚  
雖未盡所懷高逸強哉矯  
始歎齷齪人每自誇池沼  
終當陪東封今日爲之兆

菁城襍詠

山長周澍 錢塘

華對嶺表亂雲垂野岸  
停橈趁曉移經過石灘三十  
六計程喜到鷓鴣眉

繞郭東西藏古寺  
粥魚茶版靜無聞  
回頭不見知何處  
萬樹蒼松鎖白雲

城根一道鎖浮梁山色青蒼木葉黃經過九鵬頻北  
望灘聲如沸入寧洋  
四面山光大道長紅鱗數陣舞斜陽檐花行過朝天  
嶺別詔蘭心玉魴香  
水繞孤城漏鼓沈山光墦影樹蕭森上流夜半龍潭  
雨估客連船繫櫂林  
碧靈競秀翠烟浮山色當牕一望收滿地槐花黃似  
染宮墻更驗大龍湫

菁城畱別

許光驥  
錢塘

漳平縣志

卷九下

藝文下

六十一

纔洗征塵又戒途身如孤鶴逐雙鳧並無長物藏行  
笥猶有殘書累僕夫村店酒香盃獨酌板橋霜跡杖  
相扶黃連此去山程遠一路松杉聽鷓鴣

文公祠古梅歌

山長  
謝超元  
龍巖

卜居須擇里仁美立名須附青雲士君不見文公祠  
畔老梅株得傍宮墻播人齒其根半露石罅中其枝  
斜曳苔垣東盤挈天矯如游龍破寒一笑生春風我  
來花下春已深半庭綠葉垂濃陰豈徒不受半點俗  
塵染穆然道貌還道心惜花轉向花前道狂言唐草

莫嗔惱獨力能開天地春孤根胡托空山老歸來魂  
夢長縈思恍見花神前致詞我得名賢作花主定有  
名流相見知我聞此言三歎息梅兮置身地真得巖  
穴砥行非無徒可以人不如花乎

題斗東學博論二漳先生殉節處篇後

蔡世鉞

乾坤原逆旅況是放歸人禦敵非忘國投閒且寄身  
死生安義命樓名永安以此衾影有君臣屈子心懷楚陶公  
跡避秦辭家懷百里對月感孤輪邱首收遺燼城西

漳平縣志

卷九下

藝文下

六十二

哭比隣

次韻答謝雲谷山長

蔡世鉞

孤負春風兩縣花賴君舊樹發新桮老來愛聽鱣堂  
講花落庭閑蚤退衙

次錢冶彭學博韻

蔡世鉞

咳唾珠凝落碧天隨風吹下欲驚筵問心不羨屨三  
百貰酒翻愁斗十千所喜俗淳官易好莫教情隔政  
難宣九仙洞室從君訪共擘詩牋染黛煙九山俱在

和陸里

三月朔夜觀燈柬兩學博暨志局諸君子

蔡世鉞

黃童白叟氣歡騰如此民情得未曾柑果醉嘗千戶  
酒笙歌笑踏一城燈古稀漸近官初服斯道微窺信  
未能祝我慇懃增愧我翻因愛戴益冰兢

和蔡石坪邑侯三月初一夜觀燈詩元韻

林得震

莫怪山城喜氣騰從來有此使君曾千家競晉躋堂

酒十載初看滿市燈余在菁庠十餘年各任明府樂  
俱有慶祝從無如此盛事

漳平縣志

卷九下

藝文下

六十三

事足徵民愛戴歡聲共說吏廉能笙歌鬧處人安堵  
早已平矜並化兢

錄供感次前韻

蔡世鉞

蜃樓海市幻中騰毒草空傳翦拔曾角雀縱疑穿瓦  
屋飛蛾何苦撲油燈井憐匍匐無知入獄戒精明獨  
斷能安得蓮花生舌底三生石上化凌兢

城隍廟宿壇越五夜矣祈雨未應憂不成寐因

感呂侯爲神事作

顛澤鳩三農齋宿神寢殿問爲神者誰故是漳平縣

三河呂明經兼攝龍溪篆夜深鸞鳳鳴音樂出葱蒨  
此木宰官身匠氏迓歸院像成公子來身湧空際現  
明年仍此日瞻拜眼生眩神光赫奕中騶從閃飛電  
死哀逾生榮訃到轉欣抃百年霖雨心爲神二時距今百有歲  
不應今昔變誓欲起老蛟證作靈祇傳

明日同林廣文王少府步行至龍濟廟求雨旋

署雨降而澤未沛是夜仍宿壇次前韻

蔡世鉞

縞素千百人擁神出宮殿零吁聲撼天黑雲覆山縣

漳平縣志

卷九下

藝文下

六十四

再拜龍王亭精誠結香篆俯瞰潭水寒仰矚煙嵐蒨

移舟過祈壇文牒發道院淨瓶口已封縋入波光眩

開緘得水渾

渾則雨清則不雨

頃刻動雷電歸來步城隈潭

外舞蛟抃諸神各還宮齋宿心未變更沛三日霖敬

補神君傳

和蔡石坪邑侯齋宿城隍廟祈雨未應感呂侯

爲神事之作並依元韻

林得震

菁邑城東偏誰肇立宮殿二百餘年前陳侯首開縣  
後令三河賢呂侯來攝篆相傳歿爲神東山木蒼蒨

今侯憫雨心齋戒宿僧院理陰與理陽應共婆心現  
紅袍者何人聰明神豈眩相傳是廟中左有懇同請雨  
師驅雷並掣電庶不負蒼生百年此歡抃明日禱龍  
潭能使風雲變史筆志神靈定合二侯傳

三月晦日全石坪邑侯龍潭禱雨步行旋署甘霖立沛詩以志喜卽依前韻和之

林得震

三春憂旱枯同禱龍王殿不比月令篇常雩命百縣  
呼號聲震天雲忽如烟篆入門得滂沱萬象回葱蒨

漳平縣志

卷九下

藝文下

六十五

行看盈郊原豈獨灑庭院方信瓶水渾有如龍影現  
空中積濃陰仰觀銀海眩豐隆響轟雷列缺閃奔電  
千人吁嗟聲一旦轉欣抃共感使君恩精誠格天變  
隨車行部春好續臨淮傳

龍濟巖謝雨還循郊外勸農

蔡世鉞

爲汝酬靈貺神明鑒此衷青疇前日雨綠郭半溪風  
一笠晴秧外三杯勞酒中與天爭旦晚顆粒亦農功

高明遠眺

陳廷揚

矗爲文筆列爲屏山勢如龍此暫停甲第蟬聯環雉



堞午炊鱗次接雲扃大江東去波漂綠爽氣西來柳  
映青石鼓好迎仙客至雨花臺上聽談經

永福途中口占

霽色空林外泉聲萬壑間野禾全被隴蕭寺半依山  
屋瓦紅侵磴松聲綠作灣肩輿行過處花鳥亦怡顏

菁城雜詩

林得震

舊是清漳界崎嶇此漸平萬山圍小邑一水背孤城  
關鎖東西寺溪分大小菁居仁當附郭擇里愛斯名  
隔浦虹橋渡嚴城雉堞環補凹憑一閣臨水闢三關

漳平縣志

卷九下

藝文下

六十六

樹色圍官舍人烟雜市闌小軒閒坐眺日日對東山

東軒

丁字簾鈎亞字欄小庭舊得數弓寬春風漸長葡萄  
架朝日常臨首蓓盤不速客來呼酒熱得開懷處把  
書攤四圍樹影扶疎外龍尾山畱一角看

遊毓秀塔

半日天晴客趁閒尋幽興到訪禪關橫橋鎖合雙溪  
水孤塔撐齊四面山僧院苔痕疎雨後人家樹色夕  
陽間藍庵薄暮聞鐘磬歸路仍沿碧渚灣

讀二漳詩集

林得震

先生生是忠顯身慷慨一死俱成仁先生生與石齋  
友先後一死俱不朽長瀛山上仰高風不就止水投  
祝融一炬心同白日白九泉魂伴紅顏紅我讀先生  
二漳集歸田自安鴻羽戢小雅不聞誹怨辭放臣豈  
作新亭泣百年耿耿忠孝忱發爲敦厚和平音論詩  
格在慶厯上至情至性超高岑平生知己相期許直  
賞眞評非諛語後學何能贊一詞但覺古香流墨楮  
遺衾一幅詩數行自甘焚玉崑崙岡地下若逢劉與

漳平縣志

卷九下

藝文下

六十七

黃定欣同調賡和章

黃石齋先生評二漳集詩稱五言字字適上意格  
深老慶厯而上此爲長城得滄溟聲響而情理出  
於高岑自是近人所未能到又評七言謂雄渾高  
寄是此道正宗覺七子尚有雕鏤之苦晚近益多  
寒瘦之態岑高上下足定其倫吾鄉惟有鄭祠部  
當時亦推孫太初此道分明看天分枉煞時人坐  
讀書此總評也至各首俱有評語不能備錄亦足  
以見先生爲石齋先生所心折矣

賦

碧靈山賦

曾汝檀

凝碧子胚基於鄧林發育於蒼巖漳平爰處菁莪哦吟一旦省邱墓過一峯樂而憩焉凝神仰止忘形彼爾含青挹翠愈近愈竒乃停驛而立縱目熟視但見峻嶒端莊規模堂堂憑虛聚氣鬱乎蒼蒼一源泉以爲帶百邱陵以爲墻田千畝以爲臺松百株以作裳雨收黛色日映嵐光白雲橫度高鳥環翔非筆而芒有石而藏象金鐘之懸閣恍天柱之威國又如朝天

漳平縣志

卷九下

藝文下

六十八

之玉笏衝天之玉燭瞻扶輿以磅礴覺天秘而地蓄乃躍然起曰嗚呼山之美有是哉予嘗遊學南泉遠眺清源擅名竒特多毓英賢斯峯不亞清源也又嘗經畧莆東騁日壺公朱紫之會文章之叢斯峯不下壺公也亦嘗屢游三山俯視八閩掄魁良相鳴佩珊珊斯峯不卑三山也何諸山之毓秀皆赫赫乎其有聲而是山之聳秀獨寂乎其冥冥將文風之有待抑地勝之以人有父老杖屨而過曰噫斯碧靈也子弗聞乎紹興劉棠一桂秋香馳聲賦虎見美文場茲非

以儒名若耶乾坤鼎爐水火匡廓九龍變化動搖山  
嶽茲非以佛名者耶不曰地之靈歟而何視之輕也  
凝碧子曰子知之矣山止於此乎結而爲龍文詞章  
宜何如其卓倫鬱而爲金精道德宜何如其渾純吾  
方張斯山之具眼而何暇及一選之魁名魁名猶士  
林之珍重又何佛老之混陳昔孔顏出洙泗鳴周程  
起濂洛稱中立居兮龜山播晦庵產兮文山名山川  
來於開闢豪傑奮于中興雖孕靈有自亦聖涯獨臻  
今皆人乎不振尚奚怪乎山靈吾惟物欲眩誘莫知

已咎吾能高碧靈高吾能秀碧靈秀但主敬而存誠  
得知新於溫故遠尋闕里眞踪邇卽延平大路卽斯  
路以梯登依日光而沛露觀世道以卷舒對仁賢而  
不負雖未高此山於東蒙猶可移雲谷於西埔老人  
無以爲語退然行去凝碧子擊節而歌曰 爾碧爾  
靈兮以佞以顯我目我心兮忽豁以展故家托始兮  
山川其勝維嶽降神兮申甫誰並復移數步復返而  
顧又歌曰 峯兮人兮遠而又憐兮抱丹青而惶惶  
兮行行將與汝媿其芳兮

重陽日登碧靈山賦

陳廷揚 邑人

客有怡情翰墨寄跡山林門無剝啄室絕塵侵對蕭  
蕭之落木聽瑟瑟之寒砧其景蕭條其居寂寥望故  
園而不見覺秋思之相撩顧謂二三子曰我歌且謠  
維暮與朝兀若槁木思若剝蕉何如乘興散步逍遙  
是處有名山焉鬱鬱青青號曰碧靈近在咫尺列若  
翠屏讀會氏之舊賦心嚮往而身未一經山靈有知  
將笑我以情冥二三子能從我遊乎其携一蔬挈一  
瓶值良辰之重九相與徜徉乎翠巘雲扃二三子曰

漳平縣志

卷九下

藝文下

七十

諾乃闕柴扉訂幽約得從事於青州借雙屐於康樂  
初躡躅於山村羌紆徐於山脚仰而企之巍巍乎其  
高插天也漸而進之忽忽乎其瞻在前也塗無廢乎  
其半路有導而必先覺形神之少瘁賈餘勇而彌堅  
飄飄乎欲仙也乃造絕頂而憩焉其上則天高日晶  
氣象清明鴈飛翔於雲路人下界而聞聲其下則村  
居綿密溪流洋溢風飄丹葉之楓農割黃雲之秫穰  
往熙來迷茫而不可備悉其後則髻聳玉簪秀麗蕭  
森其前則星躔太乙崔嵬嶺峯此遙矚之遐景也且

就碧靈而形容其實夫其秀削巘岈虎踞龍蟠俯臨  
洞壑高插雲端土黃赤而潤澤勢遼濶而瀾漫舒嘯  
則巖谷俱應凝眸則眼界都寬白桐鉅實松脂渥丹  
榛栗啟罅橘柚凝寒栴檀扇裂林柿珠圓杉入巨匠  
之目石無礙趾之礚徒觀其滋生蕃□森秀鬱馥衆  
卉旣萋百穀亦熟知地氣之甚靈秉扶輿之清淑况  
復突兀撐空端圓靜穆量之莫知其高躋之原不絕  
人以獨宜其啟一邑之秀而衆山環之簇簇也二三  
子曰游殆有類於學乎其取徑也若初問途其方升

漳平縣志

卷九下

藝文下

七十一

也若勤步趨其得趣也若道味之腴其登峯而造極  
也將俯視一切而足以自娛客曰二三子學其進矣  
然境則靡窮德求益峻天下多名山此特其發軔吾  
就今茲之所游美其高且秀者之足信而已時則盞  
酒已傾游懷畢暢視落帽以尤懽較佩萸而何讓歸  
路霞蒸同人心曠旣愜幽情乃伸微唱歌曰序三秋  
兮碧靈游兮心悠悠兮滌閒愁兮悟登高之必自兮  
知竟成之有志兮山有靈而獻瑞兮登青雲而共致  
兮

銘

石鼓山銘

蔣時馨

石鼓山為吾邑八景之一近在眉睫間顧以仕途閱歷王路馳驅竟不得一登眺焉茲與

陳文翁俱在退有暇杖履及之曰目豁然不覺撫懷有感而為之銘曰

平郭之陰有山翹楚維山有石厥名石鼓伐之無聲  
名者誰子世事空華鳥兔飛走渺予一身鄰虛不數  
達人大觀愚夫莽鹵分別形骸執迷生死譬彼石兮  
徒勞匠斧柱礎則焚懷玉則剖維爾蠢然虛空同壽  
幻跡名山妄稱不朽

漳平縣志

卷九下

藝文下

七十二

重修漳平學銘

知縣 姚溥

戊子歲寇陷青城己丑春王余奉

命率鐵騎同王大將軍復焉仰觀宮牆鞠為茂草余

惄然爰葺其廊廡寘神位焉因作銘以記銘曰

天生蒸民儼儼蚩蚩爰立之君載作之師殷序周庠  
立極伊始嗟爾青城庶事咸墮莫赤匪狐如羹斯沸  
維余小子敢不肅祗式養式教毋汨秉彝夙夜欽崇  
有懷詩禮宮廟傾頽哲人斯萎爰命修之汛滌塵疇  
亦屏亦楨棟樑攸起材不奢取事戒盈忌以警昕昏

發攄靄氣虬龍鬱生惟其瑞矣虹霞煥爛惟其類矣  
鼓鐘煌煌辟雍濟濟我邦之人式燕且喜閔余微陋  
訓之父師纘引先緒修飾篋篋爰求懿德庶莫余訾  
勒之貞珉以告士子